

DA' GOSON POSTLW CA'

Jesúsen' gwne' sele' Spiritw che Diosen'

¹ Teófilo, ca nac dan' bzoja' da' nechw, bzoja' yogo' lo' da' ben Jesúsen', na' lecze bzoja' yogo' dan' bsed blo'ede' cate' gwzolaote' bsed blo'ede'

² žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'.

³ Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenезде' mbanczen'. Na' gwdalene' legaque' čhoa ža na' bzejni'ide' legaque' can' chnabia' Diosen'.

⁴ Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e.

⁵ Da' zaque' ben Juan da' bzoe' bene' nis, perw yeto' chope ža da' zaca'ch gac chele dan' yedesoa Spiritw che Diosen' lo' yichjlažda' olen' nabi'an le'e.

Jesúsen' beyepe' yaban'

⁶ Na' ža na'teze šlac ne' zjandop zjanžague' len Jesúsen' gose'ene':

—Xanto' čba bžin ža gono' cont yechoj nación Israel chechon' lo' na' bene' zito' ca'?

⁷ Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'.

⁸ Perw na' cate' yedesoa Spiritw che'na' len le'e, gaclenen le'e len yela' guac chenna' cont güe'le xtižan' ciuda Jerusalén ni, na' doxen ga mbane distritw Judean', na' distritw Samaritan', na' doxen yežlion'.

⁹ Beyož gwna Jesúsén' ca', chesena'te bene' ca' chesejnilaže' le', beyepe' yaba to lo' bejw na' bich besele'ede' le'.

¹⁰ Na' ne' chesena'te bene' ca' le'e yaban' gan' besele'ede' beyepe', cate'cze gosacbe'ede' ba zjazecha chope angl len legaque' bene' zjanyaz lache' šiš.

¹¹ Na' bene' ca' chope gose'e legaque':

—Bene' Galilea, žbixchen' chna'le le'e yaban'? Can' ble'ele beyep Jesúsén' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de lsens yesa'aque' ža che Dios can' ža ley che bene' Israel ca'.

¹³ Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' quart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'.

¹⁴ Na' gosenita'teze postlw ca' šnej chosol güiže' Diosen' txen len bene' ca' zjanaque' biše' Jesúsén'

na' len María x̄na' Jesúsen' na' len yezica'chle no'ol ca' zjanžag.

15 Na' ca hora' Pedroa' zeche' ladjo to gayoa galje bene' chesejnilaže' Jesucriston' cont be'lene' legaque' dižan', na' gože' legaque':

16 —Bene' migw, Spiritw che Diosen' benen cont rey David bzoje' na' be'e diža' che Judasen' ben' gwche' bene' ca' gosezen Jesúsen' gan' jasešague' le'. Na' benen byen goc can' nyoj Xtiza' Diosen'.

17 Judasen' goque' txen len neto' na' bene' txen len neto' yogo'loł dan' gwo'o lo na'to' bento'.

18 Na' gosezi'e late' yežlio len mechw dan' gwxi' Judasen' bene' da' malen' bdie' Jesúsen' lo na' bene' ca'. Perw na' blažoe' cosyichj gan' goładite' na' gošj li'ena', doxen xjaloen' bchoj.

19 Yogo' bene' že' Jerusalénna' gosenezde' can' goc chen' na' da'nan' bososi'e yežlion' Acéldama na' xtiža'gaque'na' zejen Yežlio Chen.

20 Goc can' nyoj to salmo žan:
Liže'na' gaquen to yo'o daš, nono soa na'.
Na' lecze nyojen žan:

Na' te bene' yoble yołane' žin dan' bene'.

21 'Na' nga nita' bene' ba gosone' txen len chio' šlac gwdalen X̄ancho Jesúsen' chio'.

22 Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyala' cuejcho toe' gone' txen len neto' postlw güe'to' diža' can' beban X̄ancho Jesúsen' ladjo bene' guat ca'.

23 Na' gosebeje' chope bene', toe' José ben' le Barsabás, na' lecz le' Justo, na' ben' yeto Matías.

24-25 Nach bosol güiže' Diosen' gose'ene':

—Xanto', le' nombi'o yichjlaždao' yogo'lol bene'. Lao bene' ca' chope blo'ešca neto' noe' ba gwlejo' cont gague' postlw na' gone' xšinon' txen len neto'. Le ca nac Judasen', gwlejyichje' dan' ngo'o lo ne'e gone' na' ba zjayde' gan' naquen yeyeje' yela' güen da' mal che'na'.

²⁶ Nach gosone' rifa cont gosenezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

2

Can' goc cate' bla' Spiritw che Diosen'

¹ Na' bžin ža lni dan' že' Pentecostés, na' postlw ca' na' yogo'lol bene' ca' ba gosejnilaže' Jesúcriston' zjandop zjanžague' toze latje.

² Na' zejzenez goc to sšag le'e yaban' ca sšag che to be' bdonon' gual na' nenxeje lo' yo'o gan' zjachi'ena'.

³ Na' besele'ede' gala'ze yichj to toe' gosezoa tgüeje yi' bel da' chala'nin.

⁴ Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolagüe' goso'e gwde gwdele diža' da' gosejni'i bene' zito' ca'.

⁵ Na' ca tiempen' bene' zan bene' Israel že' Jerusalénna' bene' chesonxene' Diosen', za'aque' doxen yežlion'.

⁶ Na' cate' gosende' chac sšaguen' gan' že' postlw ca', zan bene' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'.

⁷ Bi gosejni'ide' bin' chac na' besyebande' gosene':

—¿Gague bene' distritw Galilea bene' quinga?

⁸ ¿Nacxe_{ch}en' to tocho chenecho cheso'e diža' can' cheso'e be_{ne}' gualaž checho diža'?

⁹ Ba_lcho naccho be_{ne}' naci_on Partia, na' ba_lcho be_{ne}' naci_on Media, na' ba_lcho be_{ne}' naci_on Elam, na' ba_lcho be_{ne}' distritw Mesopotamia. Na' yeba_lcho be_{ne}' distritw Judea, na' yeba_lcho be_{ne}' distritw Capadocia, yeba_lcho be_{ne}' distritw Ponto, na' yeba_lcho be_{ne}' distritw Asia,

¹⁰ yeba_lcho be_{ne}' distritw Frigia na' be_{ne}' distritw Panfilia, na' yeba_lcho za'cho naci_on Egipto, na' yeba_lcho za'cho yež ca' zjachi' Africa do te ciuda Cirene. Na' chio' naccho cuent len be_{ne}' naci_on Roma, ba_lcho goljcho naccho be_{ne}' Israel na' yeba_lcho ben cuincho txen len be_{ne}' Israel.

¹¹ Na' ba_lcho naccho be_{ne}' yež ca' zjachi' Creta na' be_{ne}' distritw Arabia. Na' gate'tez be_{ne}' naccho, yogo'cho chenecho cheso'e be_{ne}' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

¹² Na' yogo' be_{ne}' ca' besedobe' chosozenague' besyebande' na' gosacžejlaže' bin' chac, na' zane' gosene':

—¿Bi zejen dan' chaquen'?

¹³ Na' yeba_le' goseneye'e gosene':

—¡Be_{ne}' quinga chesezožde'!

Diža' dan' be' Pedroa' len be_{ne}' Israel ca' besežag

¹⁴ Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zižje gwne':

—Le'e be_{ne}' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e.

15 Be_{ne}' lježa' quinga bitw chesezožde' can' chaquele, le ne' nac tempran.

16 Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

17 Cate' ba zoa žin ža cont yeyož yežlion', neda' Dios gona' cont Spiritw čhian' yedesoa len be_{ne}' že' doxen yežlion'.

Na' gona' cont xi'inle ca' yeso'e xtiža'na', na' be_{ne}' byo xcuide' ca' yesele'edagüede' bi da' gona', na' güe'lena' be_{ne}' byo gol ca' diža' lo bišgal čhegaquen'.

18 Na' yogo' be_{ne}' ca' chesejnilaže' neda', be_{ne}' byo na' no'ole, yedesoa Spiritw čhian' len legaque' cont yeso'e xtižan'.

19 Gona' cont yesele'e be_na_{ch}en' da' zaca' yesyebande' le'e yaban' na' lagüe yežlion', na' gona' yela' guac čhia'na' len chen, len yi' na' len žen da' nac ca bejw.

20 Bich gwseni' gwbižen', na' bio'na' yeyaquen x_na ca chen cate' za' žin ža yida' da' yoble gwnežjua' castigw čhe yogo' be_{ne}' cbi chesejnilaže'nda', neda' naca' X_nle.

Žana' gaquen to ža žialao xen.

21 Nach note'tez be_{ne}' yese_nabe' gaclena' legaque', neda' naca' X_nle yebeja' legaque' lo da' malen'. Can' gwna Diosen'.

22 'Na' le'e be_{ne}' Israel gualaž čhia', le gwzenag čhia'. Jesús_n' ben' nac be_{ne}' yež Nazaret, Diosen' blo'ede' naque' be_{ne}' zaque'. Diosen' bene' cont

Jesúsen' bene' yelá' guac na' bichle da' zaca' yebanecho can' nezcenzelen'.

²³ Lo yelá' neze che Diosen' bin' za' gac, bi'e latje gwzenle Jesúsen' na' bdelene' lo na' bene' mal ca' gosote'ne' bosode'ene' le'e yag cruzen'.

²⁴ Perw na' Diosen' bechis bosbane'ne' ladjo bene' guat ca', le bi gwzoe yelá' goten' nabian' le'.

²⁵ Quinga bzoj da' rey David xtiža' Jesúsen' cani'te, žan:

Nezda' Xana' Diosen' zoe' len neda' do ža do yel, na' zoe' chaclene' neda' cont bi chžeba'.

²⁶ Da'na'na' zoa' mbalaz na' choa' diža' leca chebeda'.

Na' lecze chebeda' nezda' yechis yosbane' neda' ladjo bene' guat ca' cate' ba gota'.

²⁷ Dios chia', nezda' bi yocua'año' neda' gan' že' bene' guat ca',

neca go'o latje gožo' cuerp chia'na', neda' naca' xi'ino' na' nac lažda'oguan' xilaže'.

²⁸ Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyož gwna Pedroa' ca' nach gože' legaque':

²⁹ —Bene' Israel, nezecho da' xozxta'ocho rey David gote' na' bosocuaše' le'. Na' nombia'cho ba gan' bosocuaše' le'.

³⁰ Na' da' rey Davin' be'e diža' can' bzejni'i Diosen' le' na' gwnezde' gwlo'o Diosen' da' bali gague da' te bi gac can' gwne'. Gwnezde' gon Diosen' cont Criston' galje' lo diaža che' na' nabi'e nación Israelen' can' gwnabia' le'na'.

³¹ Diosen' bene' cont da' rey Davin' gwnezde' can' gaquen' na' da'nán' be'e diža' che Criston' ben' ba gwsela' Diosen' cont nabi'e. Gwne' Criston' yebane'

na' bi yega'ane' gan' že' bene' guat ca' na' neca gožo' cuerp che'na'.

³² Na' Diosen' bečhis bosbane' Jesúsen' ladjo bene' guat ca', na' yogo' neto' choe'to' diža' nezeto' beyas bebane'.

³³ Na' Diosen' len yela' guac che'na' bene' cont beyep Jesúsen' gan' zoe'na' na' chnabi'e txen len le'. Na' Diosen' bnežjue'ne' Spiritw che'na' can' gwne'. Na' Jesúsen' ba bene' yela' guac nga da' ba benele na' da' ba ble'ele.

³⁴ Gague da' rey Davin' beyep yaban', san da' David bzoje' che Jesúsen' gwne':

Ḫancho Diosen' gože' Ḫanan':

“Gwche'edo' cuita' nga nabia'cho txen,

³⁵ na' gona' cont yogo' no chesegue'e le' yosozexjw yichje' yosozenague' chio'.”

³⁶ 'Da'nan' yogo' chio' bene' Israel cheyala' nezecho Jesúsen' ben' betwle bda'lnē' le'e yag cruz, Diosen' gwleje'ne' cont naque' Ḫancho' na' naque' Cristo, zeje diža' naque' ben' gwsela' Diosen' nabi'e nación chechon'.

³⁷ Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca':

—Bene' gualaž, čbin' cheyala' gonto'?

³⁸ Nach Pedroa' gože' legaque':

—To tole cheyala' yetinjele xtoła'le ca' na' soale nis dan' ba chejnlaže'le Jesucriston', na' Diosen' yezi'xene' chele na' gone' le'e Spiritw che'na' soan lo' yichjlažda'olen'.

³⁹ Ḫancho Diosen' gone' note'tezle Spiritw che'na' can' ba gwne', le'e na' xi'inle ca' na' note'tez

be_{ne}' zito', le chnežjuen' yogo' be_{ne}' chbeje' cont yesaque' lo ne'e.

⁴⁰ Nach Pedroa' be'lene' legaque' diža' zan, na' gw_{ne}yoede' legaque' gwne':

—Le yechoj ladjo be_{ne}' mal quinga be_{ne}' cbi zjanombia' Dios.

⁴¹ Ca' goquen' be_{ne}' ca' gosejle'e diža' dan' be' Pedroa' gosezoe' nis. Na' lo žana' šon mil be_{ne}' gosejnilaže' Jesúsen' na' gosaque' txen len yezica'chle be_{ne}' chesejnilaže' le'.

⁴² Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle be_{ne}' gosejnilaže' Jesúsen' na' gose'ej gosagüe' txen na' gosenite' bosol güiže' Diosen' txen.

Can' goson be_{ne}' ca' gosejnilaže' Criston' da' nechw

⁴³ Na' yogo'ze be_{ne}' besyebande' can' goson postlw ca' da' zan da' güen da' zaca' yebanecho len yela' guac che Diosen'.

⁴⁴ Na' be_{ne}' ba chesejnilaže' Jesúsen' gosaque' toze na' gosone' toze yogo'lol da' zjade chegaque'.

⁴⁵ Na' gosote' yežlio na' bichle da' zjadede' na' mechw dan' besele'ede' chen goseyisen' lao yogo'lole' con da' beseyaže to toe'.

⁴⁶ Na' tža tža besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz.

⁴⁷ Gosenita'teze' gosonxene' Diosen'. Na' gosa- zlaže' be_{ne}' yezica'chle can' gosone'na'. Na' tža tža Xancho Diosen' bene' cont gosanch be_{ne}' ca' gosejnilaže' Jesucriston'.

3

Beyac to bene' nxinj ni'e

¹ Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosol güiže' Diosen' yogo' ža.

² Na' gwzoa to bene' nxinj ni'e ca goljte' na' yogo' ža gosebec bene' le' cho'a puert che yodao'na', puert dan' nzi' Puert Xdan, cont gwñabe' mechw lao bene' ca' chja'ac yodao'na'.

³ Nach cate' bžin Pedroa' len Juan yodao'na' na' ben' nxinj ni'ena' bol güiže' legaque' yosonežjue'ne' mechw.

⁴ Nach Pedroa' len Juanna' gosebeze' na' gosenachgüe' le' na' Pedroa' gože'ne':

—Gwñna' neto'.

⁵ Na' bena' bene' xbab yosonežjue'ne' mechw.

⁶ Perw Pedroa' gože'ne':

—Bibi mechw chia' de da' gona' le', perw zoa to da' gona' gaclena' le': len yela' guac che Jesu-criston' bene' naque' bene' yež Nazaret, chona' mandadw gwzoža' na' gwda.

⁷ Na' Pedroa' beḡoe' ne'e lica na' bsože'ene', na' gocte gwzeche' na' ni'ena' la' besyeyacten da' gual na' lecz ca' bechj ni'e ca'.

⁸ Na' cate' goebe'ede' ba besyeyac ni'en', bxite' yela' chbe che'. Na' gwyo'e chašil che yodao'na' len legaque' chxite' na' cho'e yela' choxclen che Diosen'.

⁹ Na' bene' ca' že' chašilen' besele'ede' can' chde' chxite' cho'e yela' choxclen che Diosen'.

¹⁰ Na' besyeyombi'e le' naque' ben' chbe' chñab mechw yogo' ža cho'a puert che yodao'na', puert

dan' nzi' Puert Xdan, na' leca besyebande' da' ba beyac ni'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yogo' beṇe' že' yodaon' besežagsese' chašila' cont jasene'e ben' beyaquen', le besyebanchgüede'.

¹² Na' cate' Pedroa' ble'ede' ba zjanžag beṇe' zan gan' nite'na' nach be'lene' legaque' diža', gože' legaque':

—Le'e beṇe' gualaž chia' beṇe' Israel, ¿bixchen' chebanele? ¿Chaquele len yela' guac cheton' bento' cont beyac bengā? ¿Še chaquele beyaque' dan' chonchguato' can' chazlaže' Diosen'? Bi naquen ca'.

¹³ Dios ben' gosonxen da' xozxta' ocho Abraham, Isaac na' Jacob, blo'e nac Xi'ine' Jesúsēn' beṇe' zaca' juisyw. Perw le'e bdele Jesúsēn' lo na' justis ca' cont gosote'ne' na' bžonle cate' Pilaton' goclaže' gwsane'ne'.

¹⁴ Can' benle len Jesúsēn' la'czla' naque' beṇe' laždao' xilaže' juisyw na' naque' la'zelagüe beṇe' chon da' güen. Nach gwṇable bosan Pilaton' to beṇe' güetw beṇe' na' bi gwṇable yosane' Jesúsēn'.

¹⁵ Na' ca nac Jesúsēn' ben' bxe yela' mban toli tocanē, le'na' betwle, perw na' Diosen' bechis bosbane' le' ladjo beṇe' guat ca'. Neto' ble'eto'ne' na' choe'to' diža' ba bebane' ladjo beṇe' guat ca'.

¹⁶ Na' chle'ele bengā cbi goc se'e na' nombia'lnē', na' na'a ba beyac ni'ena' len yela' guac che Jesúsēn' ben' chejnilaže'to'. Le da' chejnilaže'to' Jesúsēn',

da'nan' besyeyacšagüe' ñi'a benga na' ba chle'ele can' beyaquen'.

17 'Beñe' migw, ñezda' le'e na' beñe' gole blao chele ca' betwle Jesús'en' lagüe bi gwyejni'ile Diosen' gwsele'ne'.

18 Na' da' benle ca', goc can' gwna Diosen' gac, da' bene' mandadw bosozoj da' beñe' ca' goso'e xtižen' cani', bosozoje' che Criston' ben' gwlej Diosen' cont ñabi'e. Bosozoje' che' gosene' yosoči yososaca' beñe' le'.

19 Da'nan' le yeyonšca xbab chele na' le yetinje xtoła'len' cont Xancho Diosen' gwnitlagüen' na' gone' ga soale mbalaz.

20 Nach Xancho Diosen' sele' Jesús'en' yežlio nga yetñi'a, ben' gwleje' cani'te cont naque' Cristo checho.

21 Perw chonen byen yega'an Jesucriston' yaban' ña'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena beñe' gwleje' cani' cont goso'e xtižen'.

22 Da' Moisés'en' be'lene' da' xoxta'ocho diža', gože' legaque': "Xancho Diosen' sele' yeto beñe' gualaž chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ñe'.

23 Na' Diosen' gone' yesebiayi' yogo' beñe' ca' cbi yosozenague' che bena' sel'en', na' bich yesenite' txen len beñe' ca' chesonxene' le'." Can' gož Moisés'en' da' xoxta'ocho ca'.

24 'Lecz ca' yogo'loł beñe' goso'e xtiža' Diosen' cani', gwzolaozen len da' Samuel na' yogo' beñe' ca' gosedeč, goso'e diža' che da' ca' ba chac tiemp ña'a.

25 Le'e nacle xi'in diaža che da' bene' ca', na' dan' gož Diosen' legaque' gone', na' dan' gože' yezica'chle xoxta'ole ca', lecz naquen che le'e. Gože' da' Abrahanna': "To bene' galje lo diaža chio' gone' cont bene' že' doxen yežlion' nite' mbalaz."

26 Da'nan' cate' Diosen' bosbane' Xi'ine' Criston' ladjo bene' guat ca', zgua'tec gwsele'ne' lao chio' bene' Israel da' goclaze' gaclene' chio' cont to tocho yetinjecho xtola'chon'.

4

Pedroa' na' Juanna' nite' lao bene' gwnabia' ca'

1 Ne' chesoe'lente Pedroa' na' Juanna' bene' ca' diža' cate' besežin bal bxoz che bene' Israel ca', na' bene' gwnabia' che ben' chesape' yodao' blao chegaque'na' na' bene' saduceo ca' bene' cbi chesejle'e še yesyeban bene' guat ca'.

2 Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesúsen'.

3 Na' bene' blao ca' gosezene' Pedroa' len Juanna' na' goseyixjue' legaque' ližya do yel, le ba chxin na' bi gola' yesone' yela' justis chegaquen' ca' cheyala' že'na', san bosocuezen' beteyoch.

4 Na' ca' nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže'ne' cana', gosac do gayo' mil bene' byo cbi cuent no'ole.

5 Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' bzoj da' Moisés, besedop besežague' ciuda Jerusalénna'

⁶ len Anás ben' naquech bꝑoz blaο, na' len Caifás, na' Juan, na' Alejandro na' nochle beṇe' zjanaque' biše' ljež ben' naquech bꝑoz blaon'.

⁷ Na' gosone' mandadw jasexi'e Pedroa' na' Juanna' na' cate' ba zjazie' laogaquen' gosenabde' legaque':

—¿No ben l̄sens chele cont beyonle beṇe' nxiṇjen'? o ¿no yela' guac che bchinle beyonlene'?

⁸ Na' Spiritw che Diosen' dan' yo'o lo' yichjlaždao' Pedroa' benen cont gože' beṇe' ca':

—Le'e beṇe' gwnabia' na' beṇe' gole beṇe' blaο che nación Israel chechon',

⁹ chṇable nac bento' da' güen beyonto' bena' nxiṇj ṇi'ena'.

¹⁰ Le'e na' yogo' beṇe' gualaž cheyala' nezele Jesucriston' ben' naque' beṇe' Nazaret bene' yela' guac che' cont beyacšagüe' benga. Le'e betwle Jesucriston' bda' lne' to le'e yag cruz, perw Diosen' bechis bosbane'ne' ladjo beṇe' guat ca'.

¹¹ Bi gwyejle'le che Jesucriston', da'nan' zaca'leble ca beṇe' cheson yo'o beṇe' bi chesazlaže' yej güen da' ba naquen yej squin che yo'ona'.

¹² Toze Jesucriston' guac gone' chio' yela' mban toli tocaṇe, na' noch no zoa doxen lo yežlion' beṇe' gac gone' yela' mban toli tocaṇe che chio' beṇačh.

¹³ Besyebane beṇe' gwnabian' can' boži'i Pedroa' na' Juanna' xtiža'gaquen' sin cbi besežebe', le nachbia' zjanaque' beṇe' yixe' na' bi zjansedteque'. Nach gosacbe'ede' legaquen' ba gosodalene' Jesúsēn'.

¹⁴ Na' dan' zecha ben' beyaque ṇi'ena' txen len Pedroa' na' Juanna', bi besyežele beṇe' gwnabian' bi yesēne' chegaque'.

15 Nach be_{ne}' gwnabian' besyebeje' postlw ca' chyo'ole šlac bosoxi'e le_{ga}cze' nacle yesone'.

16 Na' be_{ne}' gwnabian' gose' lježgaque':

—¿Bi goncho len be_{ne}' quinga? Yogo' be_{ne}' že' ciuda Jerusalén ni zja_{ne}zde' gosone' to yela' guac xen na' bi gac ye'cho be_{ne}' bi gosone' yela' guaquen'.

17 Letechoze goncho cont cbi gaslas diža' dan' cheso'ena'. Da'nan' cheyala' ye'cho le_{ga}que' gata' castigw che_{ga}que' še yesoe'che' xtiža' Jesúsén'.

18 Nach gosaxe' Pedroa' na' Juanna' da' yoble na' gose'e le_{ga}que' bich yeso'e diža' che Jesúsén' na' noch no yososed yosolo'ede'.

19 Nach Pedroa' na' Juanna' bosyoži'e xtižen' gose'e le_{ga}que':

—Le gon xbab che da' nga, ¿chaquele chaclaže' Diosen' gwzenagto' chele o še chaclaže' gwzenagto' che le'?

20 Bi gac cuzto' bich güe'to' diža' che da' ba ble'eto' na' ba beneto'.

21-22 Na' da' zan da' gose' be_{ne}' gwnabia' ca' le_{ga}que' cont yosošebe'ne'. Perw na' bi beseželde' nacle yesone' le_{ga}que' castigw, le be_{ne}' zan chesonxene' Diosen' dan' beyac bena' len yela' guac che Diosen'. Ba gwdie' choa iz na' ca goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

23 Na' Pedroa' len Juanna' cate' bososan be_{ne}' gwnabian' le_{ga}que' jaya'aque' gan' nita' yezica'chle be_{ne}' chesejnilaže' Criston' na' gosoe'lene' le_{ga}que'

diža' yogo'lo| can' gose' b̄xoz gwnabia' ca' na' bene' gole blao ca' legaque'.

24 Na' cate' gosende' dan' gose' Pedroa' len Juanna' legaque', toze can' gosone' xbab na' bosol̄ güiže' Diosen', gosene':

—X̄anto' Dios, len' beno' yaban' na' yežlion' na' nisaon'. Len' beno' beṇach na' be ca' chesaš na' bica'chle da' zjade, na' len' chnabi'o doxen.

25 Na' le' beno' cont da' rey David bzoje' diža' quinga dan' gož Spiritw chion' le', žan:

Bene' ca' cbi zjanaque' bene' Israel chesase' contr le', X̄anto' Dios,

perw bicze gac can' chesone' xbaben'.

26 Bene' gwnabia' che nación ca' na' che yež ca' txen zjanaque' chesone' contr le' X̄anto' Dios, na' contr Xi'ino' Criston' ben' gwselo' cont ṇabi'e.

27 Na' X̄anto' Dios, naquen da' li rey Herodes na' Poncio Pilato na' bene' cbi zjanaque' bene' Israel gosaque' txen len bene' Israel ca' lo ciuda nga. Na' yogüe' gosone' txen cont gosote' Xi'ino' Jesúsén' ben' nac bene' laždao' xilaže' juisyw, ben' gwlejo' cont ṇabi'e.

28 Gosone' can' gwchogbi'o gac dan' bžio' bia' cani'te.

29 Na' na'a X̄anto', gwna can' cheson bene' gwnabia' ca', le chesaclaže' yosošebe' neto' bene' güen žin chio'. Na' goclen neto' cont bi žebto' güe'to' xtižo'na'.

30 Na' cate' güe'to' xtižo'na' blo'ešca yela' guac che Xi'ino' Jesúsén' bene' laždao' xilaže' juisyon' cont gac yela' guac, na' yesyeyac no bene' chesacšene na' gac bichle da' yesyebane bene'.

³¹ Na' cate' beyož bosol güiže' Diosen', Diosen' bene' gwxo' gan' zjandop zjanžague'na' na' Spiritw che'na' gwzoachguan len legaque', nach gosoe xtiža' Diosen' sin cbi besežebe'.

Gosone' dan' zjade čhegaque' toze

³² Na' yogo' beņe' ca' gosejnilaže' Criston' toz ca gosac yichjlažda'ogaque'. Na' yogo' bi da' zjade čhegaque' gosonen' toze, na' nono gwna: “Čhia' da' nga”, o “Čhia' da' na”, le naquen che yogo'lol gaque'.

³³ Na' postlw ca' len yeļa' guac xen che Diosen' bosozejni'ide' beņe' Jesúsēn' bebane' ladjo beņe' guat ca'. Na' Diosen' goclenchgüe' legaque' len bi dan' gosone'.

³⁴ Na' bibi goc falt bi da' beseyažje beņe' gosejni-laže' Criston', le beņe' zjanape' no yežlio o no yo'o gosoten'. Na' mechw dan' besele'ede' che to ton

³⁵ bosonežjuen' postlw ca', na' postlw ca' goseyisen' len beņe' beseyažjden'.

³⁶ Can' ben to beņe' Chipre beņe' le José. Naque' xi'in diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' beņe'.

³⁷ Joséna' bete' to yežlio che' na' mechw dan' ble'ede' čhen bnežjuen' postlw ca'.

5

Da' mal dan' goson Ananías na' Safira

¹ Na' zoa to beņe' le Ananías na' no'ol čhe'na' Safira, na' gosote' to yežlio čhegaquen'.

² Perw na' legacze' bosoxi'e yosonežjue' late'ze mechw dan' besele'ede' čhen na' yese'e postlw ca'

doxenenna'. Nach gwyej Ananíasen' na' bnežjue' postlw ca' mechon'.

³ Nach Pedroa' gože'ne':

—Ananías, ¿bixchen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosen'? Chi'o neto' chono' doxen mechon' dan' ble'edo' che yežlion', len ba gwlo'ošagüe'le laten' par cuinle.

⁴ Chio' yežlion' cate' biṇa' goton', na' chio' mechon' dan' ble'edo' cate' beton' na' zaco' cont beno' da' chaclažo' len len. ¿Bixchen' benle da' malen' nac ca'? Gague contr neton' ba benle benlaže'le, san contr Diosen'.

⁵ Nach Ananíasen' cate' bende' xtiža' Pedroa' to gwbiṇze' na' gote'. Na' yogo' bene' ca' gosende' diža' can' goquen' besežebchgüe'.

⁶ Na' besežin to chope bene' xcuide' gan' gwbiṇ da' Ananíasen' na' bosyochele' cuerp chen' to lache' na' besyeyo'ene' ga bosocuaše'ne'.

⁷ Na' gwde do šon hor gote' cate' bžin no'ol che'na' na' gwo'e lo' yo'on sin cbi nezde' bin' ba goc che bene' chen'.

⁸ Na' Pedroa' gože'ne':

—¿To ca'te' ble'ele che yežlion'?

Na' Safiran' gože'ne':

—To ca'te'ten'.

⁹ Nach Pedroa' gože' no'olen':

—¿Bixchen' goco' toze len bene' chion' chaquele gonle Diosen' prueba še lede' can' že' bi cheyała' xoayagcho? Cho'a puert nga zjazecha bene' ba bosocuaše' bene' chio'na' na' ṇa'a yeso'e le'.

10 Na' la' gwbiḡte Safiran' lao Pedroa' na' gote'. Na' cate' goso'o beṇe' xcuide' ca' lo' yo'ona' be-sele'ede' ba gote' nach goso'ene' jasecuaše'ne' cuit da' beṇe' che'na'.

11 Na' yogo' beṇe' chesejnilaže' Criston' besežebe' can' goquen' na' lecze besežebe' yezica'chle beṇe' gosende' diža' can' goquen'.

Gosone' da' zan yela' guac

12 Na' postlw ca' gosone' da' zan yela' guac na' bichle da' besele'e beṇe' da' zaca' yesyebande'. Na' beṇe' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Chašil che da' Salomón.

13 Na' yezica'chle beṇe' ca' že' Jerusalénna' gosapchgüe' legaque' bala'an, la'czla' besežebe' yesaque' txen len legaque'.

14 Perw na' zane' gosejnilaže' Xancho' na' gosaque' txen, zan beṇe' byo na' no'ole.

15 Na' cate' no beṇe' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesechele' bxin che' na' yesyeyacde' še bi yižgüen' chese'ede'.

16 Na' beṇe' ca' že' yež da' zjachi' gała'ze ciuda Jerusalénna' ja'aque' zjanche'e beṇe' chesacšene na' beṇe' zjajo'o zjanyaz da' xigüe'. Na' yogo'lole' besyeyacde'.

Beṇe' saduceo ca' goseyixjue' Pedroa' len Juanna' ližya

17 Nach ben' nacch bḡoz blao na' yezica'chle beṇe' saduceo beṇe' cbi chesejle' yesyeban beṇe' guat, besegue'ede' postlw ca'.

18 Na' gosezene'ne' na' goseyixjue' legaque' ližya.

19 Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' be-beje' legaque'. Na' gože' legaque':

20 —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban chegaque' toli tocanē.

21 Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bχoz blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'.

22 Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao bene' gwnabia' ca' jasyedixjue'ede'.

23 Gose'e bene' ca':

—Nyeyjwchach ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

24 Na' ben' nacch bχoz blao na' bene' gwnabia' che ben' chesap yodaon' na' bχoz gole blao ca' cate' gosende' rsonna' besyebande', gosene':

—¿Nac gac da' nga na'a?

25 Na' šlac chesacžejlaže', bžin to bene' gože' legaque':

—Bene' ca' gwdixjwle ližyan' zjaze' chašil che yodao' blaona' chososed chosolo'ede' bene'.

26 Nach bene' gwnabia' che ben' chesap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' bene' chosozenag xtiža' postlw ca' še yosožie' legaque' yej.

27 Na' cate' besežin postlw ca' lao bene' gwnabia' ben' nita' chosoxi'a, nach ben' nacch b̄xoz blao gože' legaque':

28 —Ba bento' mandadw bi güe'le diža' che Jesúsen' na' bich gwsed gwlo'ele bene' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

29 Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosen' clel ca' che benach.

30 Le'e betwle Jesúsen' bda'ln'e' to le'e yag cruz, perw Dios ben' chonxenko na' ben' gosonxen da' xozxta'ocho ca' bechis bosbane'ne' ladjo bene' guat ca'.

31 Na' na'a Diosen' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli tocanē che bene' chesejnilaže'ne'. Na' le'na' chazlaže' gaclene' yogo' chio' bene' Israel yetinjecho xtoła'chon' nach yezi'xene' chechon'.

32 Neto' nezeto' can' ben Diosen' len Jesúsen' na' choe'to' diža' chen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw chen' zoan lo' yichjlaždao' bene' chosozenag che'.

33 Na' beseža'achgua bene' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'.

34 Perw gwzoa to bene' fariseo len legaque' bene' le Gamaliel. Chsed chlo'ede' bene' ley dan' bzoj da' Moisésen' na' gosapchgua bene' le' bala'an. Na'

Gamalielen' gwzeche' na' bene' mandadw yese-
choj postlw ca' chyo'ole šlac güe'lene' be_{ne}' ca'
že'na' diža'.

³⁵ Na' gože' be_{ne}' ca' že'na':

—Be_{ne}' gualaž, cheya_{la}' goncho xbab nac gon-
cho len be_{ne}' quinga cont goncho da' nac güen.

³⁶ Le yosa'laže' can' goc cate' bchoj ben' le Teudas
gwne' naque' be_{ne}' zaque'. Na' do tap gayoa be_{ne}'
bosozenag che' na' gosaque' le' txen. Perw na' bžin
ža gosot be_{ne}' le' na' besyeyas_{las} ben' gosaque' le'
txen, gague bi gocch yesone'.

³⁷ Na' gwdechle ca tiempen' bosoch_ele' ba_l be_{ne}'
že' to to yež, bchoj to be_{ne}' distritw Galilea ben' le
Judas na' be_{ne}' zan gosaque'ne' txen. Na' lecze bžin
ža gosote'ne' na' be_{ne}' ca' gosaque' le' txen lecze
besyeyas_{lase}'.

³⁸ Na' da'n_{an}' žia' le'e can' chacda' cheya_{la}' gon-
cho, jaseye be_{ne}' quinga, bibi gonecho lega_{que}'. Le
še chososed chosolo'ede' xbab chegacze', yeniten.

³⁹ Na' še dan' chososed chosolo'ede' naquen che
Dios, bibi gac goncho cont cbi gaslasen. Cheya_{la}'
gwsaca'cho cont bi til_{len}cho Diosen'.

⁴⁰ Na' gosazlaže' be_{ne}' gwnabia' ca' can' gož
Gamalielen' lega_{que}'. Nach gosaxe' postlw ca'
na' goseyine' lega_{que}' na' gosone' mandadw bich
yososed yosolo'ede' che Jesúsen' bate'tezechle.
Nach bososane' lega_{que}'.

⁴¹ Na' ca nac postlw ca', cate' besyechoje' gan'
gota' y_ela' güexian', chesyebede', le Diosen' be'e
latje bosochi bososaca' be_{ne}' lega_{que}' ne_{che} dan'
chososed chosolo'ede' che Jesúsen'.

⁴² Na' yogo' ža bososed bosolo'ech postlw ca' che
Jesucriston' do liž be_{ne}' na' cate' chja'aque' yodao'

blaona'.

6

*Beñe' ca' chesejnilaže' Criston' gosebeje' gaže
beñe' goson žin bixjw*

¹ Na' ca tiempen' zej chanch beñe' ca' chesejnilaže' Jesucriston' na' beñe' ca' cheso'e diža' griego gwzolao chesežeše', chesene' no'ol güezeb ca' nchixe legaque' bi chesezi'e lebe len no'ole güezeb ca' cheso'e diža' hebreo cate' cheseyise' dan' chese'ej chesagw to togaque'.

² Nach postlw ca' šižinw bosyotobe' yezica'chle beñe' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwsed gwlo'eto' beñe' xtiža' Diosen' cont chisto' dan' yese'ej yesagw beñe'.

³ Da'nan' beñe' migw, le cuej gaže beñe' lježle, beñe' zoachgua Spiritw che Diosen' len legaque', beñe' zjanac beñe' sina' na' beñe' cheson da' güen, na' le gon lo na'gaque' yeseyise' dan' yese'ej yesagw beñe' ca'.

⁴ Na' neto' soateze soato' yol güižto' Diosen' na' gwsed gwlo'eto' beñe' xtižen'.

⁵ Na' gosazlaže' yogo' beñe' ca' na' gosone' can' gose' postlw ca' legaque', na' gosebeje' to beñe' le Esteban beñe' chejnilaže' chgua Diosen' na' zoachgua Spiritw che Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás beñe' ciuda Antioquía ben' bene' txen len beñe' Israel.

⁶ Na' bosozoe' legaque' lao postlw ca' na' postlw ca' bosol güiže' Diosen' chegaque' na' gosexoa

na'gaquen' yichj bene' ca' cont gosezi' lo ne'e žin dan' yesonen'.

⁷ Na' bene' zanch gosende' xtiža' Xancho Jesu-criston', na' zan bene' Jerusalénna' gosejnilaže'ne' na' lecze zan bχoz ca' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac che Diosen' len le' na' Diosen' goclenchgüe' le'. Da'nan' bene' yela' guac na' bichle da' zaca' yesyebane bene' lao bene' ca' že' na'.

⁹ Na' zoa to yodao' dan' chesene' Yodao' che Bene' ca' Bich Zjanaque' Esclavos. Bene' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bal bene' ca' gwzolao gosacyože' len Estebanna',

¹⁰ perw na' bi besyeželde' nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'.

¹¹ Nach gosego'oyele' to chop bene' cont goso'e diža' güenlaže' che', gosene' Estebanna' gwnye'e che da' Moisésen' ben' bzoj ley che bene' Israel ca'. Na' lecze gosene' Estebanna' gwne' diža' ya' che Diosen'.

¹² Na' bene' ca' gosacyože' che Estebanna' bosota bosone' bene' lo ciuda na' bene' gole blao che bene' Israel ca' na' bene' ca' chososed chosolo'ede' ley dan' bzoj da' Moisésen' cont gosaque' toze. Na' ja'acsesen' gan' zoa Estebanna' na' gosezene'ne' na' goseche'ene' gan' že' bene' ca' chesenabia' nación Israelen'.

13 Na' goseyljue' be_{ne}' goso'e diža' güenlaže' be_{ne}' gosene' che':

—Benga bicze šize zoe' ch_{ne}' diža' bya' che yo-dao' blao che Diosen' nga na' ley dan' bzoj da' Moisés.

14 Ba beneto' že' Jesús ben' naque' be_{ne}' yež Nazaret yochinje' yodao' blaona' na' yoše'e costumbr checho dan' ben da' Moisés mandadw na'ocho.

15 Na' yogo' be_{ne}' ca' zjachi' gan' chesone' yela' justisen' gosen_e'e cho'alao Estebanna' na' be-sele'ede' chactiten ca cho'alao angl.

7

Choe' Estebanna' diža'

1 Nach ben' nacch b_xoz blaona' gože' Estebanna':

—¿Naquen can' chesena be_{ne}' quinga?

2 Na' Estebanna' gože' le_{ga}que':

—Le'e be_{ne}' gole na' note'teze be_{ne}' gualaž, le gwzenag chia' len to chop da' n_{ia}' le'e. Diosen' ben' nac la'zelagüe be_{ne}' zaca' blo'elagüe' da' xozxta'ocho Abraham cate' gwzoe' distritw Mesopotamia cate' za' šjasoe' ciuda Harán.

3 Na' Diosen' gože'ne': “Bchoj lažo' na' gwlejjychj be_{ne}' biše' lježo' na' gwyej jaso_a latje gan' gwlo'eda' le'.”

4 Beyož gož Diosen' Abrahanna' ca', nach Abrahanna' bchoje' gan' že' be_{ne}' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga.

5 Diosen' bi bnežjue' da' Abrahanna' yežlio gaquen che', ne late' da'ozen', san gwne' gaquen

che xi'in diaža che' cate' ba gote', la'czla' nono xi'ine' na' soa cate' gož Diosen' le' ca'.

6 Nach Diosen' gwne' šjasenite' laž bene' zito' tap gayoa iz ga yesaque' esclavos na' yesežaglaochgüe'.

7 Nach Diosen' lecze gože'ne': "Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonxene' neda' nga."

8 Nach Diosen' gože' Abrahanna' gone' güen len xi'in diaža che'na'. Na' bene' mandaw soa Abrahanna' to señw dan' že' circuncisión, le' na' len bene' byo ca' zjanaque' diaža che', cont gacbia' le cheseje'e che dan' gwna Diosen'. Da'na'na' cate' golje xi'ine' Isaaquen' bzoe'be' señw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

9 Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gosezi' bene' nación Egipto le'. Perw Diosen' gwzoe' len Josén'.

10 Na' goclene'ne' len yogo'lol da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na' goche'ede' naque' bene' sina'. Na' da'nan' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

11 Na' goc gwbin doxen Egipton' na' lecze can' goc gan' nzi' distritw Canaán na' da' xoxxta'ocho ca' bi beseželde' da' yesagüe' na' besežaglaochgüe'.

12 Perw na' bžin ža da' Jacoben' bende' diža' de trigw Egipton' na' gwsele' da' xoxxta'ocho ca' jasexi'en da' nechw.

13 Na' bechop ni'a ja'aque' cate' ben Josén' ga besyeyombia' bene' biše' ca' le', nach gwneze faraónna' can' nac diaža che Josén'.

14 Na' Josén' bene' mandadw šjasexi'e xagaque' Jacoben' na' yogo'lol biše' lježe' ca', zjanaque' ca do gayonšino' bene'.

15 Can' goc gwey Jacoben' jasoe' Egipton' na' Egiptona' gote', na' lecz na' gosat xi'ine' ca' bene' ca' gosac xozxta'ocho.

16 Na' gwdechle besyeyo'e žit benat chegaquen' na' jasecuaše'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' cani'te che xi'in da' Hamor gwduxjuen' mechw.

17 'Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba zej chan bene' Israel ca' že' laž bene' Egipto ca'.

18 Na' ca' chac beža' rey che Egipton' na' rey coben' bi gwnezde' can' goclen Josén' nación chen'.

19 Na' rey nga gw diljwlaže' bi da' mal bene' len da' xozxta'ocho bene' Israel ca' na' bene' mandadw šjasecho'on xi'ingaque'na' cont yesatbe'.

20 Na' ca' tiempen' golje da' Moisésen' na' bebe Diosen' lebe', na' xaxna'be' bososcha'ogüe'be' šone bio'.

21 Perw na' bžin ža jasecho'on šaze'be' na' xi'in faraónna' to no'ole beželde'be' na' beyo'ebe' liže' boscha'ogüe'be' ca' xi'ine'.

22 Ca' goquen' bsd da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

23 'Na' choa ize da' Moisésen' cate' gwanan šjane'e bene' Israel gualaž che' ca'.

24 Na' jale'ede' to bene' Egipto chchi chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'.

25 Bene' xbab gocde' yesacbe'e bene' gualaž che' chaclen Diosen' le' cont yosle' legaue' lo na' bene' Egipto ca', perw bi gosacbe'ede'.

26 Na' beteyo gosedił chopze bene' Israel. Na' bžin da' Moisésen' gocde' gone' cont yesenite' binlo, na' gože' legaue': "¿Bixchen' chdillen lježle le'e nacle bene' gualažze?"

27 Nach ben' nap doła'na' bžigue' da' Moisésen' ca'ale gože'ne': "¿No gwna le' gaco' bene' gwnabia' cont gono' yela' justis cheto'na'?"

28 ¿Lez chaclažo' goto' neda' can' beto' bene' Egipton' neje?"

29 Na' cate' bene da' Moisésen' can' gož bena' le' nach bxonje' jasoe' nación gan' nzi' Madián la'czla' naque' bene' zito' len bene' ca'. Na' bšagne'e na' gwnita' chope xi'ine'.

30 'Na' goc choa iz zoe' na', cate' to angl bene' gwsela' Dios blo'elagüe' le' latje dašen' gala'ze Ya'a Sinaí, yo'o anglen' to lo' yi' bel chdoljen to lo' yag xis yeše'.

31 Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' chol güiž Xancho Diosen' le', che'ene':

32 "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwxize' catec bžebe', gague cheyaxjde' ne'e.

33 Na' gož Xancon' le': "Gwlečhj xelo'na' cont gapo' neda' bala'añ, le latje gan' zechao'na' naquen

chia'.

³⁴ Neda' ba ble'eda' yela' yaše' yela' zi' da' chde nación chia' Israelen' bene' že' Egipton' na' ba benda' ca chesonyaše'. Da'na'na' gaclena' legaque'. Beda na'a cont sela' le' Egipton'."

³⁵ 'Diosen' gože'ne' ca' la'czla' bene' Israel ca' cbi gosezi'e che', gose'e Moisésen': "¿No gwna le' gaco' bene' gwnabia' cont gono' yela' justis cheto?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' legaque' lo na' bene' Egipto ca', na' angl che Diosen' ben' ble'e da' Moisésen' lo' yi' bel gwzoe' goclene'ne'.

³⁶ Na' da' Moisésen' bebeje' legaque' Egipton' gan' bene' zan yela' guac na' bichle da' zaca' yebane bene', na' lecz ca' bene' cate' besežine' Nisdao' Xnan' na' šlac gosenite' latje dašen' choa iz.

³⁷ Na' da' Moisésnan' gože' da' xozxta'ocho ca': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che benan' gwzenagle."

³⁸ Da' Moisésen' gwzoe' len da' xozxta'ocho ca' latje dašen', na' lo Ya'a Sinaín' to angl bene' gwseła' Diosen' gože' le' diža' da' zjansa' yela' mban, na' bzoje' dižan' par chio'.

³⁹ 'Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'.

⁴⁰ Na' šlac zej da' Moisésen' lo Ya'a Sinaí, gose'e bene' biše' Aarónna': "Ben da' le'echo da' šejnilaže'cho na' da' cuialao laochi tnez. Le ca nac Moisésen' ben' bebej chio' Egipton', nono neze bin' ba goc che'."

41 Nach gosone' to me' go'n dao' de oro na' gosote' no beyixe' gosoxene' me' daon', na' gosone' l̄ni che bena' gosone' len ni'a na'gaque'.

42 Da'nan' Diosen' gwlejiyichje' naci3n Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' goso'e xtiža' Diosen' cani', žan:

Le'e bene' Israel, gague nedan' benxenle caten' betwle beyixe' latje dašen' lao čhoa iz.

43 Benle no da' benxenle, na' bia'le yodao' da' chacte chedobe gan' benxenle dan' nzi' Moloc,

na' bia'le beljon' benxenle dan' nzi' Renfán.

Na' dan' ba gwlejiyichjle neda', da'nan' cueja' le'e gan' zoalen' na' seļa' le'e naci3n zito' do gan' nzi' Babilonia.

44 'Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley čhegaque'na'. Na' gosonen' con can' gož Diosen' da' Moisésen' na' con can' blo'ede' le'.

45 Nach cate' da' Josué gwčhe'e legaque' gan' ben Diosen' cont goseque'e yežlio che bene' zito' ca', lecze goso'e yodao' da' chacte chedobe. Na' ne' bosochine' yodaon' bžinten tiemp che da' rey David.

46 Na' Diosen' bebede' da' rey Davin', na' da' Davin' goclaže' gone' to yodao' che Diosen', Dios ben' lecze benxen da' Jacoben' cani'te.

47 Perw na' da' xi'ine' Salom3n benen'.

48 Na' Diosen' ben' chnabia' doxen, bi nacho zoe' lo' yo'o da' chon benachen', san chac can' gwna Diosen' dan' bzoj to bene' be' xtiže'na' cani', žan:

49 Neda' zoa' yaba chnabia',
 na' guac gona' con bi chazlaža' lo yežlion'.
 Na' ĵchaquele gonle to liža'na'?
 Neda' bi chyažjda' yo'o ga yezi'laža'.

50 Neda' bena' yogo'te da' zjade.

51 'Dan' bi chzenagle, dan' bi chejle'le lo'
 lažda'olen' nacchguale bene' güedenag can' gosac
 da' xoxxta'ocho ca'. Bicze chzenagle che Spiritw
 che Diosen'.

52 Da' xoxxta'ocho ca' lecze bosochi bososaque'
 bene' ca' goso'e xtiža' Diosen' cani', na' gosote'
 legaque' caten' goso'e diža' can' sela' Diosen' Xi'ine'
 ben' nac bene' güen juisyw. Na' cate' bide', le'e
 bdelne' lo na' bene' ca' gosote'ne' na' le'e naple
 dola' dan' gosote'nen'.

53 La'czla' nombia'le ley dan' bosonežjw angl ca'
 da' Moisésen', bi chzenagle chen.

Gosote' Estebanna'

54 Na' cate' Esteban' gože' legaque' ca', beseloc-
 chgüe' gosagwxejte laye'.

55 Perw na' Esteban' gwzoachgua Spiritw che
 Diosen' len le', bcos lagüen' gwne'e yabale na'
 ble'ede' chac to be'ni' gual gan' zoa Diosen' na'
 ble'ede' zecha Jesúsén' cuit Diosen' chnabi'e txen
 len le'.

56 Nach Estebanna' gwne':

—Le na'šc nla'xeje yaban' na' nla' Jesúsén' ben'
 golje' beñach zeche' cuit Diosen' chnabi'e txen len
 le'.

57 Nach bene' ca' zjanžaguen' leca beseloque' na'
 bososya'adie' na' bososeyjw naggaque'na' na' to
 ši'ize ja'acsese' gan' ze Estebanna'.

58 Nach gosebeje' Estebanna' cho'a yež na' bosožie'ne' yej. Na' beṇe' ca' bosožie' le' yejen' bosonežjue' xagaque' da' zjandobe' to beṇe' xcuide' beṇe' le Saulo cont gapen'.

59 Na' šlac chosožie' Estebanna' yej, Esteban' bol güiže' Diosen', gwne':

—Xana' Jesús, bezi' neda' yaban'.

60 Nach bzoa xibe' lo yon' na' gwne' zižje, gwne':

—Xana' bi gono' cuent xtoḷa' beṇe' quinga dan' chesote' neda'.

Na' beyož gwne' ca', gote'.

8

Saulo bchi bsaque' beṇe' chesonxen Jesucriston'

1-2 Na' ca' nac Saulon', gwyazlaže' dan' gosote' da' Estebanna'.

Na' beṇe' ca' chesejnilaže' Jesucriston' ciuda Jerusalénna' jasecuaše' da' Estebanna', na' gosebežchgüe' che'. Na' gwde gosote' da' Estebanna' gosezolagüe' bosochi bososaque' beṇe' ca' chesedop chesežag chesonxene' Jesucriston' Jerusalénna', na' yogo' beṇe' ca' chesonxen Jesucriston' besyeyasḷase', ja'aque' yež ca' zjachi' do distritw Judean', do distritw Samaria, perw gague len postlw ca'.

3 Na' Saulon' gwzolagüe' cheje' liž to to beṇe' ca' chesonxen Jesucriston' chjaḷobe' no beṇe' byo na' no no'ole cont chče'e legaque' ližya.

Beṇe' ciuda Samaria gosende' diža' güen che Jesucriston'

4 Na' bene' ca' chesonxen Jesucriston' ben' besyeyaslase' ja'aque' doxen, jasedixjue'ede' xtiža' Jesucriston'.

5 Na' ben' le Felipe bžine' ciuda Samarian' na' be'e diža' che Jesucriston'.

6 Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'.

7 Bebeje' da' xigüe' ca' zjajo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' güeje cuerp chegaque'na' beyone' legaque', lecze beyone' no bene' nxinj ni'e.

8 Na' besyebchgüe bene' ca' že' ciudan'.

9 Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samarian' gwziye'e legaque' gože'ne' naque' bene' zaque'.

10 Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

11 Zan iz bosozenague' che', le gwziye'e legaque' len yela' guaža' che'na'.

12 Perw cate' Felipen' gwdixjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, bene' byo na' no'ole.

13 Na' lencze Simón gwyejle'e che' na' gwzoe' nis na' gwzolaogüe' gwdalene' Felipen', na' bebande' ca' nac yela' guac ca' dan' chon Felipen' na' yezica'chle da' zaca' yebanecho.

14 Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'.

15-16 Na' cate' besežine'na' bosol güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca' hora' bina' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesúsén'.

17 Nach gosexoa na' postlw ca' yichjgaque' cont gwzoo Spiriton' lo' yichjlažda'ogaquen'.

18 Na' ble'e Simón can' cheson postlw ca' chesexoa ne'e yichj bene' cont chzoo Spiriton' len legaque', na' bšabde' legaque' mechw.

19 Gože' legaque':

—Le gon cont neda' gac xoo na'a yichj note'teze bene' na' soa Spiriton' len legaque' can' chon le'e.

20 Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'.

21 Bi zaco' gono' da' nga chonto', le yichjlažda'oguo' naquen mal lao Diosen'.

22 Da' cheyala' gono', betinje da' malen' chono' na' gwnab goclen lao Diosen' cont yezi'xene' chio' ca' nac xbaden' yo'o lo' yichjlažda'oguo'.

23 Nachbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

24 Nach Simónna' boži'e xtižen' gože' le':

—Le nab goclen lao Xancho' cont ne to da' mal dan' bač gwnao' nga bi gac chia'.

25 Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho

Jesucriston' legaque', nach jaya'aque' Jerusalénna'.
Na' šlac zjaya'aque'na' goseyixjue'ede' xtiža'
Xancho Jesucriston' len beŋe' ca' že' yezica'chle
yež ca' gan' mbane distritw Samaria.

Felipe na' beŋe' Etiopía

²⁶ Nach Xancho Diosen' gwsele' to angl beŋe'
gože' Felipe:

—Gwyej gan' xoa nez dan' chetj Jerusalénna' na'
chden latje dašen' chžinen yež dan' nzi' Gaza.

²⁷ Nach Felipe gwlo'e nezen', na' šlac zeje'
ble'ede' to beŋe' nación Etiopía zeyo'e to lo' carret
zeze'e gwyeje' Jerusalénna' jenkene' Diosen'. Le'
naque' to beŋe' blao na' ba none' le' capar cont
gone' xšin no'ole gwnabia' che beŋe' Etiopía ca',
šo'o lo' ne'e mechw che'. Na' no'ole gwnabian' le'
Candace.

²⁸ Na' ben' yo'o lo' carreten' chlabe' libr dan' bzoj
da' Isaíasen' ben' be' xtiža' Diosen' cani'.

²⁹ Nach Spiritw che Diosen' gožen Felipen':

—Jayxen carreten' na' gwyejlene' txen.

³⁰ Nach gwza'ses Felipen' cont jayxene' carreten'
na' cate' bžine' gala'ze bende' chlab ben' libr dan'
bzoj da' Isaíasen'. Nach gože'ne':

—¿Chejni'ido' dan' chlabo'na'?

³¹ Na' beŋe' Etiopían' boži'e xtižen' gože' Felipen':

—¿Nacxe gac šejni'ida' da' ngan', le' gague no nla'
no gwzejni'ide' nedan'?

Nach gota'yoede' Felipen' cont gwyo'e lo' car-
reten' gwche'lene'ne'.

³² Na' gan' chlabe'na' nyojen žan:

Ca to xila' be nxob beŋe' cont gote'ba',

na' ca to xila' dao' be bi chosya'a cate' chšibe'ba',

can' bene', bibi gwne' caten' gosezi' gosebage'ne'.

³³ Na' gosone' le' ca to beṇe' bibi zaca'.

Na' bi gosone' yela' justis che' ca cheyala' gaquen.

Na' nono diaža che' nita', le goseque'e yela' mban
che' lo yežlio nga.

³⁴ Nach beṇe' Etiopían' gože' Felipen':

—Benšca goclen gwna neda' no chen' ža ben' bzoj
Xtiža' Diosen' ca', ěche cuinen' že' ca' o še che beṇe'
yoble?

³⁵ Nach Felipen' gwzomagüe' bzejni'ide' bi zejen
dan' chlab beṇe' Etiopían', gože' le' diža' güen che
Jesúsen'.

³⁶ Na' ca' chac, besežine' ga žia nis, nach bena'
gože' Felipen':

—Nga žia nis, ěcbi gac soa' nisen' ṇa'a?

³⁷ Nach Felipen' gože'ne':

—Še chejnilažo' Jesucriston' do yichj do lažo',
guac so' nisen'.

Nach gwne':

—Chejli'a Jesucriston' naque' xi'in Diosen'.

³⁸ Nach bene' mandadw bcueze' carreten' na'
betj Felipen' len beṇe' Etiopían' jasežo'e lo' nisen'
cont Felipen' bzoe'ne' nis.

³⁹ Na' cate' besyechoje' lo' nisen', Spiritw che
Diosen' la' beche'eten Felipen' ga yoble, na' bich
ble'e beṇe' Etiopían' le'. Na' mbalaz beza' ben'
beyo'e lo' carreten'.

⁴⁰ Nach Felipen' bžine' yež dan' nzi' Azoto na' gw-
zomagüe' gwdixjue'ede' diža' güen che Jesucriston'
to to yež da' zjachi' gala'ze ga gwdie' bžinte' Ce-
sarean'.

9

Diosen' bocobe' yichjlaždao' Saulon'
(Hch. 22:6-16; 26:12-18)

¹ Na' Saulon' con chdacze' cho'e diža' can' chaclaže' gote' beņe' chesejnilaže' Xancho Jesucriston' na' chdacze' cheyljwlaže' nacle gone' gote' legaque'. Na' da'nan' Saulon' gwyeje' lao bxož blao che beņe' Israelen',

² na' gwnabde'ne' gwzoje' to yiš da' goxe' yosolab beņe' že' to to yodao' nita' ciuda Damasco cont yesenežde' nape' yela' gwnabia' sene' beņe' ca' ba chesejnilaže' Jesucriston' na' gwcheje' legaque' cont che'e legaque' ciuda Jerusalenna' la'czla' beņe' byo o la' no'ole.

³ Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejzenez to be'ni' da' za' yaban' gwyečjen le'.

⁴ Na' gwbiže' lo yon'. Na' bende' che' to beņe' le':
 —Saulo, žbixčhen' chchi chsaco' neda'?

⁵ Na' Saulon' boži'e xtižen' gože' le':
 —žNo le' beņe'?

Nach bena' gože'ne':

—Nedan' Jesús ben' chchi chsaco'. Na' dan' chgue'edo' neda', chone zi' cuino' can' chac che to go'ņ be chlibe lo ya dan' zoa lo carroš cheba'.

⁶ Na' do chaž chžebze' gože' le':

—Xana' Jesús, žbin' chaclažo' gona'?

Nach Xanchon' gože'ne':

—Beyas na' gwyej ciuda Damascon' na' zoa to beņe' ye'e le' da' cheyala' gono'.

⁷ Na' beņe' ca' zja'aclen Saulon' benit bečoļ gosac lo' yichjlažda'ogaque'na' catec besežebe' dan'

goquen', le gosende' ši'i beṇe' perw nono be-sele'ede'.

⁸ Nach beyas Saulon', perw cate' beṁa' lagüen' con bich ble'ede'. Nach beṇe' ca' nžague'na' gosoxe' ne'e goseche'ene' Damascon'.

⁹ Na' šone ža gwzoe' sin cbi ble'ede' na' bi güe'ej gwdagüe'.

¹⁰ Na' zoa to beṇe' chejnilaže' Xancho Jesucriston' Damascon' beṇe' le Ananías, na' Ananíasen' ble'edagüede' Xanchon'. Na' Xanchon' gože'ne':

—Ananías.

Na' boži'e xtižen' gwne':

—Nga zoa, Xana'.

¹¹ Nach Xanchon' gože'ne':

—Gwzoža' na' gwyej liž Judas dan' zoa cay dan' chesene' Nez Licha, na' nabo' to beṇe' le Saulo, to beṇe' ciuda Tarso. Ba chol güiže' neda'.

¹² Na' ba bena' cont ble'edagüede' le' gwyo'o gan' zoe'na' na' gwxoā nao' yejlagüe'na' cont yele'ede'.

¹³ Nach Anaíasen' boži'e xtižen' gože' le':

—Xana', ba benda' beṇe' zan cheso'e xtiža' bena', ca nac da' mal juisyw ba bene' Jerusalén len beṇe' ca' ba gwlejo' cont zjanaque' lo nao'.

¹⁴ Na' chesene' ze'e nga noxe' yiš che bxož gwn-abia' ca' cont sene' yogo'loḷ neto' chejnilaže'to' le'.

¹⁵ Nach Xancho Jesucriston' gože' Ananíasen':

—Gwyej, le ba gwleja' Saulon' cont šjazejni'ide' xtiža' len beṇe' cbi zjanac beṇe' Israel na' len rey čhegaque' ca', na' lente le'e nacle beṇe' Israel.

¹⁶ Na' gwlo'eda'ne' ca nac da' yaše' da' zi' da' gac čhe' dan' gwzenague' čhia'.

17 Nach Ananíasen' gwyeje' gan' zoa Saulon' na' gwyo'e lo' yo'ona' na' gwxo'a ne'e yejlao Saulon', gože'ne':

—Bene' migw Saulo, Xancho Jesúsén' ben' blo'elagüe' le' tnez gan' za'ona' ba gwsele' neda' zedena'a le' cont yeledo' na' soa Spiritw che Diosén' len le'.

18 Nach la' besyeyinjte da' ca' že' lo yejlagüen', zjanaquen ca yid bdi'ej, na' la' bele'etede'. Nach gwzože'e cont gwyeje' gan' gwzoe' nisen'.

19 Ca beyoža' gwdagüe' na' beyaclaže'. Na' bega'ane' Damascon' yeto chop ža len bene' ca' chesejnilaže' Xanchon'.

Saulon' be'e xtiža' Diosén' Damascon'

20 Na' la' gwzolaote gwyeje' to to yodao' be'e diža' che Jesúsén', gwne' len' naque' Xi'in Diosén'.

21 Na' yogo' bene' ca' chesende' xtiže' dan' cho'ena' besyebande' na' chese' lježe':

—¿Gague bengan' chda chonit cholane' bene' ca' chesejnilaže' Jesúsén' ciuda Jerusalénna'? na' ¿gague da' na'czen' bide' nga na'a cont gwcheje' bene' ca' na' šjasane' legaque' lao bxoz gwnabia' ca'?

22 Na' Saulon' tža tža Diosén' goclene'ne' cont be'e diža' che Jesúsén' tcho'a, gwne' Jesúsén' naque' ben' gwsela' Diosén' cont nabi'e. Na' bene' Israel ca' že' Damascon' bi beseželde' bin' yesene', le gosache'ede' dan' che'e legaque' naquen da' li.

Saulon' bi goque' lo na' bene' ca' chese'guede' le'

23 Na' cate' ba goc sša choe'len Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'.

24 Na' gosenite' chesape' to to cho'a puert che ze'ena' dan' nyechj ciudan' cont yesezene' Saulon' yesote'ne' bate'teze choje', perw na' Saulon' gocbe'ede' ba zjachi'na'ogüe'ne'.

25 Na' bene' ca' chesejnilaže' Jesucriston' besyeletje'ne' le'e ze'e dan' nyechj ciudan' šeže'le besyegüe'ene' to lo' žome cont goc bechoje' lo ciudan'.

Gwyej Saulon' Jerusalénna'

26 Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'lole' besežebe' le', bi gosejle'e še da' li ba chejnilaže' Jesucriston'.

27 Nach Bernabé gwche'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesúsén' šlac ngüe'e nez zeje' Damascon' na' can' goc Xancon' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesúsén' Damascon' sin cbi bžebe'.

28 Nach postlw ca' gosejle'e can' goc che Saulon', na' gwzolao gwdalen Saulon' bene' ca' chesejnilaže' Jesucriston' Jerusalénna'.

29 Na' sin cbi bi chaž chžebe' gwzologüe' chzejni'ide' bene' Israel ca' diža' che Xancho Jesúsén', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'.

30 Na' cate' bene' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach goseche'ene' ja'aque' ciuda Cesarea na' besyesele'ne' ciuda Tarso.

³¹ Na' be_{ne}' ca' chesedop chesežague' chesonx-ene' Jesucriston' doxen distritw Judean', distritw Galilean' na' distritw Samaritan' gosenite' binlo, noch no bosochi bososaca' lega_{que}', na' gosenita'cha_{che}' gosejnilaže' Xancho Jesús_{en}' na' bosozenague' che' do yichj do laže'ga_{que}'. Na' Spiritw che Diosen' benen cont gosaccha_{ch} laže'ga_{que}' na' benen cont gwyane'.

Beyac ben' le Eneas

³² Ca nac Pedroa' cheje' to to yež gan' že' be_{ne}' ca' ba gwlej Diosen' cont zjana_{que}' lo ne'e chja_{ne}'e lega_{que}'. Na' to ža gwyeje' ja_{ne}'e be_{ne}' ca' že' yež dan' nzi' Lida.

³³ Na' yež Lidan' jati'e to be_{ne}' le' Eneas. Ba chac xono' iz de' che'ede', natzi' late' cuerp che'na'.

³⁴ Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'.

³⁵ Na' yogo'lo_l be_{ne}' že' Lidan' na' be_{ne}' že' yež dan' nzi' Sarón besele'ede' bena' ba beyacde' na' gosebejyichje' costumbr chega_{que}' cont gosejni-laže' Xancho Jesucriston'.

Dorcas bebane' ladjo be_{ne}' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejni-laže' Jesucriston' na' zoe' chone' da' güen na' chaclene' no be_{ne}' yaše' be_{ne}' chyažj chchine'.

³⁷ Perw na' gocšene Dorcasen' na' gottechgüe', na' bosoguazje'ne' na' gosexoe'ne' to lo' cuart da' zoa yichj yo'o cha'te.

³⁸ Na' gala'ze chega'an yež Lidan' len Jopen', na' beņe' ca' chesonxen Jesucriston' Jopen' gosenezde' Pedroa' zoe' Lidan'. Nach gosesele' chope beņe' jasata'yoede' Pedroa' gose'ene':

—Benšca goclen yo'o len neto' netec na'a.

³⁹ Na' Pedroa' la' gwza'te' gwyje' len beņe' ca'. Na' cate' besežine' Jopen', goseche'ene' lo' yo'o gan' xoa beņe' guaten', na' la' gosebiga'te yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis.

⁴⁰ Nach Pedroa' bešaše' yogo'lol beņe' ca' chyo'ole na' bzoa xibe' bol güiže' Diosen'. Na' beyechje' chņe'e cuerp che no'olen', na' gože'ne':

—Tabita, gwyas.

Nach la' bexa'te yejlao da' Dorcasen' gwne'e Pedroa' na' la' bebe'te'.

⁴¹ Nach Pedroa' bexue' ne'ena' bsože'e le', nach goxe' no'ole güezeb ca' na' yezica'chle beņe' ca' zjanaque' lo' na' Diosen' na' blo'ede' legaque' ba beban Dorcasen'.

⁴² Na' yogo'lol beņe' Jopen' gosende' can' goquen', na' beņe' zanch gosejnilaže' Xancho Jesucriston'.

⁴³ Na' Pedroa' bega'ane' Jopen' zan ža, gwzoe' liž to beņe' le Simón, beņe' chonšagüe' yid.

10

Pedroa' na' Cornelio

¹ Na' ciuda Cesareana' zoa to beņe' le Cornelio, naque' xan to gayoa soldadw, na' bosozoa la soldadw che' ca' Beņe' Italia.

² La'czl̄a' Cornelion' cbi naque' bene' Israel, benxene' Diosen', na' lecze ca' goson bene' lo' yo'o che', chesezoe' chesape' Diosen' bala'an. Na' Cornelion' chaclenteze' bene' Israel bene' chyažj chchhine', na' zoateze' chol̄ güiže' Diosen'.

³ Na' goc che', to ža do cheda šone ble'edagüede' to angl bene' gwsela' Diosen' gwyo'e gan' zoe'na', na' anglen' gože'ne':

—Cornelio.

⁴ Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nezde' can' zo' chol̄ güižo'ne' na' chnežjo' dan' cheseyažje bene' yaše', na' Diosen' chaclaže' gaclene' le'.

⁵ Da' nga gono' na'a, gwsela' bene' šjasexi'e to bene' zoa ciuda Jopen' bene' le Simón na' lecze le' Pedro.

⁶ Zoe' liž to bene' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyała' gono'.

⁷ Cate' beza' anglen' Cornelion' goxe' chope mos che' na' to soldadw bene' chaclen le', na' soldadoa' lecze chonxene' Diosen'.

⁸ Na' Cornelion' bzejni'ide' legaque' yogo'lolte can' goquen' nach gwsele' legaque' Jopen'. Na' gosegüe'e nez zja'aque'.

⁹ Na' beteyo gała'ze ba zja'aque' za' yesežine' ciuda Jopen' cate' Pedroa' gwloe' yichjo'o che yo'o gan' zoe'na' ca do guagwbiz cont jel̄ güiže' Diosen'.

¹⁰⁻¹¹ Na' šlac choe'lene' Diosen' diža' gwdonchgüe', con goclaže' gagüe' cate. Na' šlac

chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'.

¹² Na' lo'enña' zjaže' yogo' cuen beyixe' že' yežlion', be žia tap ni'a na', na' be chososa' le'eban' lo yo, na' len be žia xil be chaš le'e yaba.

¹³ Nach bende' gož Diosen' le':

—Gwyas Pedro na' betw be ca' gwdagw.

¹⁴ Nach Pedroa' gože'ne':

—Bi gagua' legacba' Xana'. Ne tni'a bina' gagua' be zban zjanac ca', le cbi de lsens len ley cheto'na' gagwto' ben' zjanac ca'.

¹⁵ Nach Diosen' gože' le' da' gwchope:

—Ben' bačh gwnia' gago' bi nao' be zban zjanacba'.

¹⁶ Da' gwyon ni'a gož Diosen' le' ca' nach la' begüete lachen' le'e yaban'.

¹⁷ Šlac chacžejlaže' Pedroa' bi zejen dan' ble'edagüeden', besežin bene' ca' gwseła' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'.

¹⁸ Nach zižje gosenabe' še le na' zoa to bene' lecze le Simón Pedro.

¹⁹ Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone bene' cheseyiljue' le'.

²⁰ Gwzoža' na' beyetj cont šejleno' legaque', na' bi gacžejlažo' la'czla' bi zjanaque' bene' Israel, le neda' gwseła' legaque'.

²¹ Nach Pedroa' beyetje' jašague' bene' ca' gwseła' Cornelion', nach gože' legaque':

—Nga zoa', nedan' Simón Pedro. ¿Bičen' chey-iljwle neda'?

22 Nach gose' bene' ca' le':

—To xan soldadw bene' le Cornelio gwsele' neto'. Le' zejcz'e chone' da' güen na' chonxene' Diosen' na' yogo'lol bene' Israel ca' cheso'e xtiže' ca bene' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

23 Nach gwlo'o Pedroa' legaque' yo'o na' besyega'anlene' le' tže'. Nach beteyo Pedroa' gwyase' gwejlene' legaque' na' gwche'e to chope bene' Jopen' bene' chesejnilaže' Jesucriston'.

24 Na' beteyo cate' besežine' ciuda Cesarean', Cornelion' bačh ntobe' biše' lježe' len xmigüe' ba zjažie' liže'na' chesebeze' le'.

25 Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'.

26 Na' Pedroa' bsože'e le', gože'ne':

—Bezoža'. Lecze benačh neda'.

27 Na' ne' choe'lente' le' dižan' ca' cate' gwyo'o Pedroa' lo' yo'on na' ble'ede' bene' zan ba že' lo yo'ona'.

28 Nach gože' legaque':

—Nezeczzele ley che neto' bene' Israel žan bi cheyała' šo'to' liž bene' bi zjanaque' bene' Israel, na' žan bi cheyała' gonto' txen len le'e bi nacle bene' Israel. Perw bačh bzejni'i Diosen' neda' ne to bene' cbi cheyała' gona' xbab che' naque' bene' zban par šo'a liže'na'.

29 Da'nan' cate' bene' quinga bedesexi'e neda', bi gocžejlaža' še nacle gona', san ba bida' do yichj do laža', na' na'a chaclaža' nezda' ¿bixchen' gwnio' neda'?

30 Nach Cornelion' gože'ne':

—Na'a chac tap ža do cheda šone zoa' sin cbibi nagua', na' chol̄ güiža' Diosen' liža' nga, cate'cze ble'eda' to beṇe' byo lagna'na' nyaze' to lache' da' chgo'oten be'ni'.

31 Nach gože' neda': “Cornelio, ca nac da' gwṇabdo' Diosen', baḥ bzenague' chen, na' nezde' chnežjo' da' chyažj da' chchine' beṇe' yaše'.

32 Na' na'a gwsela' to chope beṇe' šjasexi'e to beṇe' zoa ciuda Jopen' beṇe' le Simón Pedro. Zoe' liž to beṇe' lecze le Simón, to beṇe' chonšagüe' yid. Liž ben' chonšagüe' yiden' zoan gała'ze cho'a nisdao'. Na' cate' la' Pedroa' ližo' nga nach güe'lene' le' diža'.”

33 Nach la' gwsela'tia' beṇe' ca' bedesexi'e le', na' choxclenteco' baḥ bido'. Na' nezczc Diosen' yogo'to' nita'to' nga gwzenagto' yogo'lolte dan' ba ben Diosen' mandadw nao'.

Pedroa' be'e diža' liž Cornelion'

34 Nach Pedroa' gwzolagüe' be'e dižan' gwne':

—Da' li baḥ nezda' nono nla' beṇe' nacho nzoa Diosen' le' to šla'aze.

35 Gate'teze beṇe' nación con beṇe' chesonxen Diosen' do yichj do laže' na' chesone' da' güen, Diosen' chbede' legaque'.

36 Diosen' gwdixjue'ede' neto' beṇe' Israel guac soato' binlo len le' še šejnilaže'to' Xi'ine' Jesucriston' beṇe' naque' Xan yogo'lol beṇe'.

37 Nezele dan' ba goc doxen distritw Judean' dan' gwzolao distritw Galilean' gwde gwdixjue'e da' Juanna' xtiža' Diosen' na' bzoe' beṇe' nis.

38 Nezele Diosen' gwleje' Jesús'en' ben' naque' beṇe' yež Nazaret cont chaclene' chio' beṇaḥ, na' be'ene' Spiritw che'na' na' yela' chnabia'. Na' gwda

Jesúsen' bene' da' güen na' beyone' yogo'lo_l bene' ca' chsaca'zi' Satanás dan' chnabia' da' xigüe' ca', le Diosen' zoe' len le'.

³⁹ Neto' nezeto' na' choe'to' diža' che yogo' da' güen da' ben Jesúsena' na' dan' bsed blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz.

⁴⁰ Perw na' Diosen' bechis bosbane'ne' ladjo bene' guat ca' beyon ža na' ben Diosen' cont Jesúsena' blo'elagüe' neto'.

⁴¹ Gague yogo'lo_l bene' besele'ede' Jesúsena' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwdagwlento'ne' txen gwde bebane' ladjo bene' guat ca'.

⁴² Jesúsena' bene' mandadw chixjue'eto' benachen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat.

⁴³ Na' da' ca' bosozoj yogo' bene' goso'e xtiža' Diosen' cani'te zjanyojen chesenan note'tez bene' yesejnilaže' Jesucriston', Diosen' yezi'xene' xtolā'gaque'na'.

Spiritw che Diosen' gwyo'on lo' yichjlaždao' bal bene' bi zjanaque' bene' Israel

⁴⁴ Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'.

⁴⁵ Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo' yichjlaždao' bene' ca' cbi zjanaque' bene' Israel.

46 Gosache'ede' gwyo'o Spiritw che Diosen' lo' yichjlaždao' beṇe' ca' že' liž Cornelion', le gosende' gosonxen beṇe' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gaque'na'.

47 Nach Pedroa' gože' beṇe' Israel ca' nžaguen':

—Bibi de da' gwžon yesezoa beṇe' quinga nisen', le nachbia' ba zoa Spiritw che Diosen' len legaque' can' zoan len chio'.

48 Nach Pedroa' bene' mandadw gosezoe' nis da' chesejnilaže' Jesucriston'. Na' gosata'yoede' le' cont bega'ane' yeto chop ža.

11

Pedroa' gože' beṇe' Jerusalén ca' can' goquen'

1 Na' postlw ca' na' yezica'chle beṇe' ca' že' distritw Judean' ben' chesejnilaže' Jesucriston' gosende' xtiža' beṇe' ca' bi zjanaque' beṇe' Israel lecze ba chosozenague' xtiža' Diosen'.

2 Nach Pedroa' beze'e gweyjeche' ciuda Jerusalénna' gan' nita' beṇe' Israel ben' chesejnilaže' Jesucriston' na' legaque' gosenelagüe' che',

3 gose'ene':

—¿Bixchen' ba gweyje' gan' že' beṇe' cbi zjanaque' beṇe' Israel na' jatagwleno' legaque'? Malen' ba beno'.

4 Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

5 —Šlac zoa' ciuda Jopen' choḷ güiža' Diosen', ble'edagüeda' ca to lache'xen nchej dapte squin ca' chetjen le'e yaban' zan' gan' zoa'na'.

⁶ Na' gw_na'ya_na' na' ble'eda' lo'en_na' že' beyix_e' ca' chaš yežlion' be žia tap ni'a na', na' ble'eda' be chososa' le'eban' lo yo, na' be žia xil be chaš le'e yaba, na' ba_l be ca' zjanacba' be znia.

⁷ Na' benda' gož Diosen' neda': "Gwyas Pedro, na' betw be ca' gwdagw."

⁸ Nach boži'an gwnia': "Xana', bi gagua' legacba'. Ne tni'aze bi_na' gagua' be zban zjanac ca', le bi de lsens len ley cheto'na' gagwto' ben' zjanac ca'."

⁹ Na' da' gwchop ni'a Diosen' gwne': "Be ba_h gwnia' gago' bi nao' zjanacba' be zban."

¹⁰ Šon ni'a gože' neda' ca' nach begüe lachen' le'e yaban'.

¹¹ Za' beyož ble'edagüeda' da'na' cate' besela'ac šone be_ne' byo gan' zoa'na' be_ne' za'ac ciuda Cesarean' chesyeyiljue'nda'.

¹² Na' Spiritw che Diosen' bzejni'in neda' cheya_la' ša'alena' lega_que' sin cbi gacžejlaža', na' gw_čhi'a be_ne' lježcho quinga xop, gweyeto' Cesarean' bžinto' liž ben' le Cornelio na' gwyo'oto' ližen'.

¹³ Nach Cornelion' be'lene' neto' diža' can' blo'elao to angl le' liže'na' na' anglen' gože'ne': "Gwse_la' be_ne' šja'ac ciuda Jopen' šjasexi'e to be_ne' le Simón Pedro.

¹⁴ Bena' ye'e le' len be_ne' lo' yo'o chio' nac gonle cont gata' yela' mban chele to_li toca_ne'."

¹⁵ Nach cate' gwzolagua' bia' dižan' len be_ne' ca' že' liž Cornelion', Spiritw che Diosen' gwyo'on lo' yichjlažda'oga_que'na' can' gwyo'on lo' lažda'ochon' cana'.

¹⁶ Nach jaysa'laža' xtiža' Xancho Jesucriston' can' gwne': "Da' za_que' ben Juan da' bzoe' be_ne'

nis, perw da' zaca'che' gac chele cate' yedesoa Spiritw che Diosen' lo' yichjlažda' olen' nabi'an le'e."

17 Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže' chone', na' ħnox naca' neda' gwžona' gon Diosen' dan' chaclaže' gone'?

18 Na' ca beyož bosozenague' xtiža' Pedroa' bich bi gosene' che Pedroa' dan' gwyeje' liž Cornelion', san goso'e yela' choxcen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže' Diosen' yesyetingde' xtołagaque'na' cont gwnežjue' yela' mban čegaque' toli tocan.

Bene' ca' chesonxen Jesucriston' ciuda Antioquía gan' mbane Siria

19 Na' gwde gosot bene' Israel ca' Estebanna', gosezolagüe' bosochi bososaca'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosaslase'. Bale' ja'aque' do distritw Fenicia, na' yež ca' zjachi' to lo' yežlio da' žia lo' nisdaon' gan' nzi' Chipre na' do ciuda Antioquía ga mbane distritw Siria. Na' gan' zja'aquen' bososed bosolo'ede' con bene' zjanac bene' Israel xtiža' Jesúsena', bi bososed bosolo'eden' bene' cbi zjanaque' bene' Israel.

20 Perw na' to chope bene' Chipre na' bene' ciuda Cirene lecze bosoxonje' ja'aque' ciuda Antioquían', na' gosezolagüe' goseyixjue'ede' diža' güen che Xancho Jesucriston' len bene' ca' cbi zjanaque' bene' Israel.

21 Na' Xanchon' goclene' legaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Xanchon'.

22 Na' cate' bene' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gwyeje' Antioquían'.

23 Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' be-bechgüede'. Nach gwneyoede' legaque' nita'chache' yosozenague' che Xanchon' do yichj do laže'.

24 Bernabén' naque' to bene' güen, na' chejni-laže'chgüe' Jesucriston' na' Spiritw che Diosen' zoachguan len le'. Na' zanch bene' Antioquían' gosejnilaže' Jesucriston'.

25 Gwde na' Bernabén' gwze'e zeje' ciuda Taron' jaydiljue' Saulon', nach cate' beželde' le', gwche'ene' Antioquían'.

26 Na' gosenite' Antioquían' tgüiz gosone' txen len bene' Antioquía ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquía na'tequen' gwzolao bososi'e bene' ca' chesejnilaže' Jesucriston' bene' cristian da' chosozenague' che Criston'.

27 Šlac nita' Bernabén' na' Saulon' lo ciuda Antioquían', besežin bał bene' Jerusalén ben' chosozende' bene' bi dan' ba gož Diosen' legaque'.

28 Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le

Claudio doxen gan' mbane nación Roman', cana' goc gwbinna' can' gwna Agabon'.

29 Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'.

30 Na' gosone' can' bosoxi'ena' nach gosesele' Saulon' len Bernabén' distritw Judean' jasenežjue' mechon' bene' ca' chosogüia chesene'e bene' chesejnilaže' Jesucriston' ciuda Jerusalénna'.

12

Gosote' Jacobon' na' goseyixjue' Pedroa' ližya

1 Na' ca tiempa' rey Herodes bchi bsaque' bal bene' ca' chesonxene' Jesucriston'.

2 Nach bene' mandadw gosote' Jacobo bene' biše' Juanna' len spada.

3 Na' goche'e rey Herodesen' chesyebe bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' goła' lni cate' chesagüe' yetextil dan' bibi levadura nchixen.

4 Nach Herodesen' gwdixjue'ene' ližya na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lnin' cont gone' yela' justis che' lao bene' že' lo ciudan'.

5 Soldadw ca' gosapchgüe' Pedroa' šlac de' ližyan', perw na' ca nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'.

⁷ Cate'cze zejzenez to angl bene' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'.

⁸ Nach gož anglen' le':

—Bego'o xpanto' na' bolej xelon'.

Nach ben Pedroa' ca'. Nach gož anglen' le':

—Bechele xadon chio' na' beyo'o len neda'.

⁹ Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con gocde' še chle'edagüede'.

¹⁰ Beyož besyedie' chop cuen gan' nita' soldadw ca' chesape' ližyan', besyežine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'.

¹¹ Cana'ch gocbe'e Pedroa' da' li ba bechoje' ližyan', nach gwne':

—Ba cheyacbe'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque bene' Israel gualaž chia' ca' yesonde' neda'.

12 Na' ne' chonte Pedroa' xbabēn' ca', gwze'e gwyeje' liž María xna' Juan ben' lecze le Marcos. Na' liž Marían' zjandop zjanžag beņe' zan chosoł güiže' Diosen'.

13 Nach bsiže' cho'a puert zaguanna' na' la' bchojte to bi' no'ole le Rode jaņa'be' non'.

14 Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyejsesbe' gan' že' beņe' ca' jayežbe' legaque' ba bla' Pedroa'.

15 Nach gose'ebe':

—¿Gague chactonto'na'?

Perw lebe' nezczēbe' le'na'. Nach legaque' gose'ebe' naquen bxin che'.

16 Perw Pedroa' ne' chsižcze' cho'a puerten'. Nach ja'aque' gosaljue'. Cate'cze besele'ede' le'na' besyebande'.

17 Nach Pedroa' bene' señw len ne'e cont gosenite' size bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyala' yosozende' Jacobon' na' yezica'chle beņe' lježgaque' can' ba goquen'. Nach beze'e zjayde' ga yoble.

18 Nach cate' gwyeni', yela' güeban juisyw gwnita' soldadw ca' na' goso'e diža', gosene':

—¿Bixen' goc len Pedroa'?

19 Nach rey Herodesen' bene' mandadw jasyediljue' Pedroa' na' gwņabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

20 Ca horan' Herodesen' chža'achgüe' bene' ciuda Tiro na' bene' ciuda Sidón ca'. Perw na' bene' ca' beseyažjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež bene' Tiro na' bene' Sidón ca' cont jasenežjue' mechw che ben' nac lo ne'e gan' mbane Herodes, ben' le' Blasto. Gosone' ca' cont Blaston' gwne' čhegaque' lao reyen', le gosaclaže' gwzenag reyen' čhegaque' cate' šja'aque' lagüe'na' šjasenabe' yesenite' binlo len le'.

21 Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e na' be'e diža' lao bene' ca' že' žana'.

22 Nach bene' ca' bososye'e, gosene':

—Diosen' choe' diža', gague benachen'.

23 Na' lo hora' gwsela' Xancho Diosen' to angl ben' ben cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

24 Perw ca' nac xtiža' Xancho Jesucriston' gos gwlałjchguan.

25 Na' Bernabén' len Saulon' beyož gosone' yogo' da' cheyala' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseche'e to bene' le Juan na' lecze lie' Marcos.

13

Bernabén' na' Saulon' ja'aque' jasedixjue'ede' xtiža' Jesucriston' yež zito'

¹ Na' len be_{ne}' ca' chesedop chesežag chesonxene' Jesucriston' ciuda Antioquían' zjančixe be_{ne}' cheseyixjue'ede' be_{ne}' yoble bi da' che' Diosen' lega_{que}', na' zjalen be_{ne}' chososed chosolo'ede' xtiža' Diosen'. Na' lega_{que}' zjalie' Bernabé, na' Simón ben' zjansi'e be_{ne}' gasj, na' Lucio be_{ne}' ciuda Cirene, na' Saulo, na' Manaén. Na' Manaén_{na}' bgole' txen len rey Herodes ben' gwnabia' distritw Galilea.

² Na' to ža be_{ne}' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' lega_{que}':

—Le cuej Bernabén' len Saulon' cont yesone' xšina' con gate'teze se_{la}' lega_{que}'.

³ Nach be_{ne}' ca' bosol güižche' Diosen' sin chi zjane'ej zjanagüe', nach gosexoa na'ga_{que}' yichj Saulon' len yichj Bernabén', gosone' ca' cont gosegüe'e xšin Diosen' lo' na'ga_{que}'. Gwdena' bosose'e lega_{que}'.

Postlw ca' goso'e xtiža' Jesucriston' Chipre

⁴ Nach Spiritw che Diosen' gwselan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na' Chipren' naquen to yežlio dao' dan' chi' lo' nisdaon'.

⁵ Besežine' yež dan' nzi' Salamina gan' mbane Chipren' na' gosezolagüe' goseyixjue'ede' xtiža' Diosen' lo' yodao' che be_{ne}' Israel ca'. Na' zjanče'e Juan ben' lecze le Marcos cont chaclene' lega_{que}'.

⁶ Na' ca' gosaše' gosodie' doxen Chipren' besežine' yež gan' nzi' Pafos. Na' Pafosna' besežague'

to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'.

⁷ Barjesúsen' naque' xmigw gobernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'.

⁸ Na' Barjesúsen' ľecze bososi'ene' Elimas, diža' griego zejen bene' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'.

⁹ Na' Spiritw che Diosen' zoachguan len Saulon' ben' ľecze le Pablo, nach bcos lagüen' gwna'chgüe' Elimasen'.

¹⁰ Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. ¿Bičen' cbi chbezo' chžono' yosozenag bene' diža' li che Xanto' Diosen'?

¹¹ Da'nan' Xanto' Diosen' gone' castigw chio' na' choló' to tiemp, bi gac le'edo' gwbiža'.

Nach la' gwcholtie', gwde ca to bejw lo yejlagüe'na', nach gwzologüe' chgan chtobe' cheyljue' no goxe' ne'e cont cue' nez.

¹² Gobernadores' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

Pablon' na' Bernabén' ja'aque' Antioquian' gan' mbane distritw Pisidia

¹³ Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw

Panfília. Na' Juan ben' lecze chese'e Marcos gwlejyichje' legaque' beyeje' Jerusalénna'.

14 Na' Pablon' len Bernabén' gosa'aque' yež Perge na' besežine' ciuda Antioquían' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e.

15 Na' ca beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo yodao'na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaže'le güe'le neyoele bene' quinga, guac nalen na'a.

16 Nach Pablon' gwzechede' bene' señw len ne'ena' cont yosozenag bene' ca' zjachi'na', na' gože' legaque':

—Le gwzenag le'e bene' Israel na' nochle chonxenle Diosen'.

17 Dios ben' chonxen chio' bene' Israel gwleje' da' xozxta'ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'.

18 Na' Diosen' gwdape' yela' chxenlaže' choa iz len da' xozxta'ocho ca' šlac gosaše' latje dašen'.

19 Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio chegaquen'.

20 Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogaše iz bžinte tiemp che da' Samuel ben' be'e xtiža' Diosen' cani'.

21 Nach tiemp che da' Samuelen' da' xozxta'ocho ca' gosenabde' Diosen' goṇe' to rey bene' nabi'e legaque'. Na' Diosen' bnežjue' legaque' rey Saúl na' gwnabi'e legaque' choa iz. Saúl nan' goque' xi'in ben' le' Cis, na' goque' diaža che da' ben' le Benjamín ben' gwzoa cani'te.

22 Nach bžin ža Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'in Isaí nga, le chaclaže' chone' can' chazlažan' na' chzenague' bite'tez da' chapa'ne'."

23 Nach na'a Diosen' ba gwsele' yeto bene' golje' lo diaža che da' rey Davin', ben' le Jesús. Ba gwsele' le' cont goṇe' chio' bene' Israel yela' mban toli tocanē can' gwne' cani'.

24 Na' cate' biṇa' solao Jesúsēn' gwsed gwlo'ede' bene', da' Juanna' gwdixjue'ede' len yogo' bene' Israel gualaž chechon' cheyala' yesyētinjde' xtołagaque' na' yesezoe' nis.

25 Na' cate' beyož ben Juanna' dan' yo'o lo ne'e gone', nach gože' bene' ca' chosozenag che': "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nacchgüe' bene' zaca', bi zaca' gona' mandadw che' lechja' no xele'."

26 'Bene' migw, chio' naccho xi'in diaža che da' xozxta'ocho Abraham, na' nochle le'e chonxenle Diosen' txen len neto' bene' Israel, xtiža' Diosen' dan' žan goṇe' chio' yela' mban toli tocanē naquen par chio'.

27 Bene' ciuda Jerusalén ca' len bene' gwnabia' chegaque' ca' bi gosejli'e gwsela' Diosen' Jesúsēn', na' bi gosejni'ide' da' ca' zjanyoj che' le'e libr

dan' bosozoj be_{ne}' ca' goso'e xtiža' Diosen' cani' la'czla' chosolaben' lo' yodaon' yogo' ža che Dios. Na' dan' bi gosejni'ide', da'nan' gosechoglagüen' yesote' Jesúsen', nach goc can' nyoj che'.

²⁸ Na' la'czla' gosenezde' bibi da' mal non Jesúsen' cont yesote' le', gosenabde' Pilaton' gone' mandaw yesot soldaw che' ca' le'.

²⁹ Na' goc che Jesúsen' yogo' dan' nyoj che' le'e Xtiža' Dios dan' bosozoj be_{ne}' ca' gosenita' cani'. Na' beyož gote'na' nach besežin be_{ne}' besyeletje' cuerp che'na' le'e yag cruzen' na' bosocuaše'ne'.

³⁰ Na' gwdena' Diosen' bechis bosbane' le' ladjo be_{ne}' guata'.

³¹ Na' be_{ne}' ca' zjanaque' Jesúsen' txen cate' gwze'e distritw Galilea cont gwyeje' ciuda Jerusalén, legaque' besele'ede' Jesúsen' yezan ža gwde bebane' ladjo be_{ne}' guata', na' legaque' cheso'e diža' chen' len yezica'chle be_{ne}' Israel.

³² 'Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'.

³³ Ba benen' len chio' naccho xi'in diaža che da' be_{ne}' ca', dan' bosbane' Jesúsen' ladjo be_{ne}' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo'."

³⁴ Na' Diosen' lecze bene' cont nyojen ga yoble che' dan' bosbane' le' ladjo be_{ne}' guaten' na' gwbat gožo' cuerp chen', žan: "Gona' güen len le' dolol can' goša' rey Davin'."

³⁵ Na' nyoj yeto salmo žan: "Bi go'o latje gožo' cuerp chian' neda' naca' ben' chacchgüedo' na' ben' chon xšinon'."

³⁶ Nezecho da' rey Davin' gwnabi'e bene' Israel ca' gwnita' ca' tiemp chen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp chen'.

³⁷ Perw na' Diosen' bosbane' Jesúsen' ben' nyoj Xtižen' žan ca', na' bi gožo' cuerp chen'.

³⁸ Na' cheyala' nezele bene' migw, Jesúsen' ben' choa' diža' che', chezi'xene' xtoła' note'tez bene' chejnilaže'ne'.

³⁹ Bi beyaccho bene' güen len Diosen' da' bi benyane'cho can' ža ley dan' bzoj da' Moisésen', perw note'tezcho chejnilaže'cho Jesúsen', len' ba cheyone' chio' bene' güen.

⁴⁰ Le gwsaca' cont bi gac chele can' bosozoj bene' ca' goso'e xtiža' Diosen' cani', žan:

⁴¹ Cheyala' gonle xbab, le'e chnelaole chia', na' cheyala' yebanele, le gwžin ža cuiayi'le. Neda' Dios gona' to da' yebanele šlac mbanle, to da' bi šejle'le la'czla' še no chixjue'e le'e can' gaca'.

⁴² Beyož bzejni'i Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yeside' ža che Dios xmanna' yeto cont yosozejni'ide' legaque' yelate' che da' ca' ba bosozejni'ide'.

⁴³ Nach bene' zan bene' Israel len zan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' goseneyoede' legaque' cont nita'che' yesejni-laže'che' Diosen' ben' chaclen legaque'.

⁴⁴ Na' cate' bežag xmanna' ža che Dios yogo'lolcze bene' lo' ciudan' besežag cont bosozenague' xtiža' Diosen'.

⁴⁵ Na' gwnita' be_{ne}' Israel be_{ne}' bi gosejle' che Jesúsen', na' cate' besele'ede' ba nac be_{ne}' zan chosozenague' che Pablon' na' gosacxi'ede' le' na' gosenelagüe' che' na' gosezi'diže' le'.

⁴⁶ Perw na' Pablon' len Bernabén' bi besežebe' san gose'e be_{ne}' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle be_{ne}' Israel gualaž cheto'. Na' na'a dan' bi chaclaže'le gwzenagle, chonle cont bi goṅ Diosen' le'e yela' mban toli tocaṅe. Da'nan' na'a gwzejni'ito' be_{ne}' ca' bi zjanac be_{ne}' Israel.

⁴⁷ Gonto' ca' neche Xanto' Diosen' bač bene' mandadw gonton', le nyojen žan:

Bač nzoa' le'e cont co'ole be'ni' chian' lo' yichjlaždao' be_{ne}' ca' bi zjanac be_{ne}' Israel, cont be_{ne}' ca' že' doxen yežlion' yesacbe'ede' guac nitlao xtolā'gaque'.

⁴⁸ Na' be_{ne}' ca' bi zjanac be_{ne}' Israel chesebede' beyož gosende' can' gwna Pablon', na' gosene' güenchgua nac xtiža' Diosen'. Na' yogo' be_{ne}' ca' ba gwlej Diosen' cont gata' yela' mban čhegaque' toli tocaṅe, legaque' gosejle'e xtiža' Diosen' dan' be' Pablon' len Bernabén'.

⁴⁹ Can' goc be_{ne}' ca' že' doxen distritwna' gosende' xtiža' Xancho Jesucriston'.

⁵⁰ Perw bal be_{ne}' Israelen' goso'e diža' len no'ol blao ca' gosonxen Diosen' na' len be_{ne}' gwnabia' blao ca' lo ciudan', na' bosoše'e xbab čhegaquen' cont gwzolao gosone' contr Pablon' len Bernabén' na' bich goso'e latje yesenite' doxen distriton'.

⁵¹ Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianna'. Gosone'

ca' cont bosolo'ede' beṇe' ca' chesyebej legaque' malen' chesone' chosolague' legaque'. Nach jaya'aque' yež Iconio.

⁵² Na' mbalazchgua gwnita' beṇe' ca' chesonxen Jesucriston' ciuda Antioquían', na' Spiritw che Diosen' gwzoachguan len legaque'.

14

Pablon' len Bernabén' besežine' yež Iconio

¹ Na' goquen' Pablon' len Bernabén' besežine' yež Iconion' na' ja'aque' yodao' che beṇe' Israel. Na' cate' goso'e xtiža' Jesucriston', beṇe' zan beṇe' Israel ca' na' len zan beṇe' cbi zjanac beṇe' Israel gosejle'e che'.

² Perw na' gwnita' beṇe' Israel ca' beṇe' bi gosejle'e che Jesucriston', na' legaque' gosnelagüe' che beṇe' ca' chesejnilaže' Jesucriston' na' gosone' cont beṇe' ca' bi zjanac beṇe' Israel gosezolagüe' besegue'ede' Pablon' len Bernabén'.

³ Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xancho' blo'e le diža' lin' cheso'e chesene' Diosen' chacde' beṇachen', le be'e legaque' yela' guac cont gosone' da' zaca' yebanecho cont gosaclene' beṇe'.

⁴ Na' beṇe' ca' že' lo yežen' gosaque' chople, bale' gosede'e beṇe' Israel ca' ben' bi gosejnilaže' Jesucriston' na' yebale' gosede'e Pablon' len Bernabén'.

⁵ Nach beṇe' Israel ca' gosone' yela' güexi'a len beṇe' ca' cbi zjanac beṇe' Israel na' len justis chegaque' cont yesone' contr Pablon' len Bernabén' na' yosochele' legaque' yej.

6 Perw cate' gwneze Pablon' len Bernabén' dan' chesaclaže' yesone' len legaque', bosyoxnje' jaya'aque' yež Lистра na' yež Derbe na' yezica'chle yež ca' zjachi' distritw dan' nzi' Licaonia.

7 Na' lecz goseyixjue'ede' xtiža' Xancho Jesu-criston' len bene' ca' že' na'.

Bosožie' Pablon' yej šlac zoe' Listran'

8 Na' yež Listran' besežague' to bene' golje' nxinj ni'e ca', cate' gocte' bidao' bi goc se'e.

9 Con chi'teze' chzenague' choe' Pablon' dižan'. Nach Pablon' gwne'e le' na' gocbe'ede' bena' chejle'e Diosen' nape' yela' guac cont yeyone' ni'en'.

10 Nach Pablon' bol güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'.

11 Na' že' bene' zan chesene'e can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca benach.

12 Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'.

13 Na' yodao' gan' chesonxene' xangaque' Júpiteren' zosan cho'a yež. Na' bxoz che Júpiteren' jaxi'e goñ be ba zjanone' xdan zjanžie' legacba' corona yej. Nach bxoza' gwche'e bene' zan cho'a yežen' gan' zoa puert che ze'e dan' nyečhj yežen' na' goclaže' yesote' goñen' yesonxene' postlw ca'.

14 Na' Pablon' len Bernabén' cate' gosacbe'ede' can' yeson bene' ca', gosečeza' xagaque' dan'

bi gosaclaže' yesonxen bene' ca' legaue'. Nach gosedie' gachol bene' ca' gose'e legaue' zižje:

15 —Bene', ¿bixchen' chonle ca'? Lecz benach neto'. Za'to' cont chyixjue'eto' le'e cheyala' gwša' yichjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocanē. Le' bene' yaban', yežlion', nesdaon', benach, be ca' chesaš na' bite'tezechle da' chle'echo le'e yaban', lo yežlion' na' lo' nis.

16 Cani' Diosen' bi bžone' gon benachen' bite'tez da' mal da' žan yesone'.

17 Perw zoacze' chone' da' güen len yogo' benach cont yesenezde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

18 Na' la'czla' Pablon' len Bernabén' gosene' yogo' da' ca', canē gosezoede' bosožone' yesot bene' Listra ca' go'ḥna' yesonxene' legaue'.

19 Nach besežin bal bene' Israel bene' nita' yež Iconio na' ciuda Antioquía dan' chi' distritw Pisidian', na' bene' ca' gosego'oyele' bene' Listra ca' cont gosaque'ne' txen bosochele' Pablon' yej. Na' cate' gosone' xbab bach gote' nach gosexobe' le' cho'a yeža' na' bosyocua'aḥe' le' na'.

20 Perw na' bene' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

21 Nach cate' besežine' Derben' bosozende' bene' ca' že' na' diža' güen che Jesucriston', na' bene' žan gosone' txen len legaue' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'.

22 Na' to to yež gan' ja'aque' gosone' chach laže' beņe' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e.

23 Na' to to yež ga besyedie' gosebeje' beņe' yosogüia yesene'e yezica'chle beņe' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' beņe' ca' ba chesejnilaže' le'.

Pablon' len Bernabén' jaya'aque' Antioquía gan' mbane distritw Siria

24 Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'.

25 Na' goseyixjue'ede' xtiža' Jesucriston' yež Perge na' beyožen' jaya'aque' yež Atalia.

26 Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le beņe' Antioquíanan' gosesele' Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont yosozejni'ide' beņe' xtiže'na'. Na' na'a besyežine' ba beyož gosone' dan' gosego'o beņe' ca' lo' na'gaque' yesone'.

27 Na' bosyotobe' beņe' ca' chesonxene' Jesucriston' na' gose'ene' yogo'lol can' ben Diosen' len legaque' šlac zja'aque', can' goclene' legaque' cont zan beņe' bi zjanac beņe' Israel ba gwzolao chesejnilaže' Jesucriston'.

28 Na' besyega'ane' Antioquían' sša len bene' ca' chesonxene' Jesucriston'.

15

Gosone' yela' güexi'a len bene' ca' že' ciuda Jerusalénna'

¹ Na' šlac Pablon' len Bernabén' ne' nite' ciuda Antioquían' besežin to chope bene' za'ac distritw Judean' na' gosezolagüe' bosozejni'ide' bene' ca' chesonxen Jesucriston' na'. Gose'ene' yogo'lol bene' byo cheyała' yesezoe' señw dan' že' circuncisión can' ža ley dan' bzoj da' Moisésen' cont gata' yela' mban chegaque' toli tocanē.

² Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosechoglagüen' šja'ac to chope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chesene'e lježgaquen' cont yesone' yela' güexi'a len legaque' che dan' chosozejni'i bene' ca' za'ac distritw Judean'.

³ Nach bene' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' bene' ca' zja'aquen' gosedi'e distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebchgüede' gosende' dižan'.

4 Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclen Diosen' legaque'.

5 Nach nita' to chope bene' Fariseo bene' ba chesonxene' Xancho Jesucriston', na' tgüje tgüje' gosezie' gosene':

—Note'tez bene' byo gonxene' Jesucriston' cheyała' soe' señw dan' nzi' circuncisión na' cheyała' gone' can' ža ley dan' bzoj da' Moisésen'.

6 Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'.

7 Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'.

8 Na' Diosen' nombi'e yichjlaždao' yogo'lol bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw chen' gwyo'on lo' yichjlaždao' bene' ca' can' ba gwyo'on lo' yichjlažda'ochon'.

9 Toz ca chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesúsriston'.

10 Ba chonle contr Diosen' dan' chaquele gwchile bene' ca' bi zjanac bene' Israel cont yesa'ogüe'

costumbr che chio' bene' Israel. Nezele catec zdebe zjanaquen, ne chio' ne xozxta' ocho ca' bi goc yesone' yogo' can' ža diža' gol cheto' ca'.

11 Bi cheyala' goncho ca', le nezecho note'tez nacho, Xancho Jesúsen' chone' yela' mban checho toli tocanē dan' chacde' chio', gague neche dan' choncho can' ža ley che Moisés.

12 Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel.

13 Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a.

14 Simón Pedro nga ba bzejni'ide' chio' can' ben Diosen' da' nechw len bene' bi zjanac bene' Israel cont blo'e chacde' legaque', ba gwleje' bale' cont zjanaque' lo ne'e.

15 Na' dan' goc ca' chotilen da' ca' bosozoj bene' goso'e xtiža' Diosen' cani', le nyojen žan:

16 Tena' yida' da' yoble na' gona' cont nabia' xi'in diaža che da' rey David,

la'czla' na'a nono xi'in diaža che' chnabia', na' gona' cont soa toe' da' yoble nabi'e.

17 Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binlo len neda'.

Note'tez bene' nación guac yosoł güiže' neda'.

18 Can' gwna Xancho Diosen' cani'te, bene' cont gosenēze bene' can' gaquen'.

19 'Na' lagüe nyoj Xtižen' žan ca', chacda' neda' bi cheyała' gonecho zed beņe' ca' bi zjanac beņe' Israel beņe' ba chesebejyichje' costumbr gole čhegaque' na' chesonxene' Diosen'.

20 Con gwzoycho ye'gacchone' bi yesone' txen len bi dan' cheson beņe' dan' chesene' naquen čhe l gua'a lsaca' dan' chesonxene', neca yesata'lene' no no'ol cbi nac no'ol čhegaque' o beņe' byo cbi nac beņe' čhegaque', neca yesagüe' be chesote' chosošoque' do lba'ba', neca yesagüe' chen čhe beyixe'.

21 Nabcho bi yesone' da' ca', le cani'te nita' beņe' to to yež chosozejni'ide' ley čechon' dan' bzoj da' Moisésen' dan' žan bi goncho da' ca', na' chosolabe' leyna' yogo' ža čhe Dios.

22 Nach postlw ca' len beņe' chosogüia chesene'e yezica'chle beņe' chesonxene' Jesucriston', na' len beņe' chesedop chesežag, gosazlaže' can' gwna Jacobon', na' bosoxi'e choj čhope beņe' lježe' šja'aque' ciuda Antioquían' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac beņe' blao len legaque'.

23 Na' bosozoje' to cart da' gosoxe' beņe' ca' žan: "Neto' postlw, len beņe' chosogüia chesene'e yezica'chle beņe' chesonxene' Jesucriston', na' len yogo' beņe' chesedop chesežag len neto', chguapto' le'e tiox le'e zoale Antioquían' na' distritw Siria na' distritw Cilicia. Bi nacle beņe' Israel perw ba nac lježcho chonxencho Jesucriston'.

24 Ba nezetu' to čhope beņe' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyała' soale señw dan' že' circuncisión na' cheyała' gonle yogo'

bichle dan' ža ley dan' bzoj da' Moisésen'. Bi ņezeto' gosa'aque' na' gague mandadw che neto' gose'e le'e ca'.

²⁵ Da'nan' gwzoato' txen bento' yela' güexi'a gwlejšto' chope beŋe' quinga chsela'to' gan' zoalen', txen len postlw Pablon' na' len Bernabén', beŋe' ca' chaquechüeto'.

²⁶ ņezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'.

²⁷ Na' chsela'to' Judasen' len Silasen' cont yosozejni'ide' le'e diža' cho'a yogo' dan' bzojšto' le'e cart nga.

²⁸ Chazlaže'to' can' bzejni'i Spiritw che Diosen' neto', na' da'nan' bi gonto' mandadw bichle da' zdebe gonle san da' quinga chaqueto' chonen byen cbi gonlen.

²⁹ Bi gagwle yela' guagw dan' ba bosožie' lo l gua'a lsacan' chesonxenen', na' bi gagwle be ca' chesote' chosošoque' do lba'ba', bi gagwle chen che beyixe', na' bi gata'lenle no'ol cbi nac no'ol chele o beŋe' byo ben' cbi nac beŋe' chele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzojšto' le'e cart nga. Diosen' gaclenšque' le'e.”

³⁰ Can' goquen' beŋe' ca' chesonxene' Jesucriston' Jerusalénna' gosesele' beŋe' ca' chope len Pablon' na' len Bernabén' gosa'aque' zja'aque' ciuda Antioquían'. Na' cate' besežine' Antioquían' bosotobe' beŋe' ca' chesonxene' Jesucriston' na' bosonežjue' legaque' carten' gosesela' beŋe' Jerusalén ca'.

³¹ Na' cate' beŋe' Antioquía ca' bosolaben' besyebede' ca' consejon' nyoj le'e carta'.

³² Na' Judasen' len Silasen' lecze gosaque' bosozende' beṇe' bin' ba gwna Diosen'. Nach gosoe'lene' beṇe' Antioquía ca' diža' zan gosone' čhačh laže'gaque' na' gosaclene' legaque' cont gosonxenche' Jesucriston'.

³³ Gosenite' Antioquían' zan ža, nach cate' bžin ža šjaya'aque', beṇe' Antioquía ca' gose'e legaque': “Nayežagcho”, na' lecze gose'e legaque' yesyežine' Jerusalénna' to šagüe' to güen.

³⁴ Na' Silasen' bečhoglaže' yega'ane' Antioquían'.

³⁵ Na' Pablon' len Bernabén' gosenita'cze' Antioquían' na' txen len yezan beṇe' bosozejni'ide' beṇe' xtiža' Xancho Jesucriston'.

Pablon' gwyeye' da' yoble gan' ba jatixjue'ede' xtiža' Diosen'

³⁶ Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjaṇa'cho nac cheson beṇe' ca'.

³⁷ Nach Bernabén' goclaže' šja'aque' na' yeseče'e Juan ben' lecz le Marcos.

³⁸ Perw Pablon' gwne' bi gonen güen yeseče'ene' dan' gwlejyichj Marcosen' legaque' cate' besežine' distritw Panfilian' na' bi benlene' legaque' xšin Diosen'.

³⁹ Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwče'e Marcosen' na' goso'e lo' barcw ja'aque' Chipren'.

⁴⁰ Na' Pablon' gwleje' Silasen' cont če'e le'. Na' beṇe' ca' chesonxene' Jesucriston' Antioquían'

bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'.

⁴¹ Na' ja'aque' to to yež ca' zjachi' distritw Sirian' na' len distritw Cilician' gosone' chačh laže' bene' ca' chesedop chesežag chesonxene' Jesucriston'.

16

Timoteon' gwzolaküe' chonlene' Pablon' na' Silasen' txen

¹ Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego.

² Na' bene' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen.

³ Da'nan' Pablon' gwñabe' šejlen Timoteon' legaque', nach gwčhi'ene' gan' bosozoe' le' señw dan' že' circuncišion. Bene' ca' le yogo' bene' že' na' gosenezde' xa Timoteon' bi naque' bene' Israel na' Timoteon' biña' soe' señon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' señua' na' gosa'aque'.

⁴ Na' to to yež ga besežine' bosozende' bene' ca' chesonxene' Jesucriston' can' nac yela' güexi'a che postlw ca' len bene' chosogüia chesene'e lježgaque' Jerusalenna' che da' ca' cheyała' yesone'.

⁵ Na' bene' ca' chesedop chesežag chesonxene' Jesucriston' gosenita'čače' gosejnilaže'ne' na' gwyanche' tža tža.

Pablon' ble'edagüede' to bene' distritw Macedonia chata'yoede' le' šeje' laže'

6 Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nan' gosodie' yež ca' zjachi' distritw ca' gan' nzi' Frigia na' Galacia.

7 Besežinte' gała'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw che Jesúsen' latje šja'aque'.

8 Nach gosodie' gała'ze distritw Misian' na' besežine' ciuda dan' nzi' Troas dan' chi' cho'a nisdan'.

9 Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'."

10 Neda' Lucas gwzoa' len legaque' na' da' ble'edagüe Pablon' bene' Macedonian', nach gwnezeto' chaclaže' Diosen' šjazeneto' bene' Macedonia ca' diža' güen che Xancho Jesucriston'. Nach bsiñi'a cheto' cont gwza'to' gwweyto' distritw Macedonian'.

Pablon' len Silasen' ja'aque' Filipos

11 Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' licha gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis.

12 Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'aŋto' to chop ža. Filipos naquen ciuda blaoch che distriton' gan' že' bene' Roma.

13 Na' cate' bžin ža che Dios bchojto' ciudan' na' gwweyto' cho'a yegw gan' chaqueto' chjasel güiže'

Diosen', nach gwche'to' na' be'lento' no'ol ca' ba zjandoben' diža' güen che Jesucriston'.

14 Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'.

15 Nach le' len bene' lo' yo'o che' gosezoe' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gwejto' jasoato' ližen', le bene' byen.

16 Na' to ža zejto' gan' chosol güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chneya'abe', na' gan xen chombe' par xambe' ca' chneya'abe'.

17 Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban chele toli tocane.

18 Ba chac zan ža chombe' ca' cate' goque Pablon' zed, na' gwyečje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

19 Na' gwdena' cate' gosacbe'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaque' lagüe ya'a gan' že' bene' ca' chesenabia' ciudan'.

20 Na' cate' besežine' gan' že' justis ca', gose'e legaque':

—Be_{ne}' Israel quinga chesaše' chesebeque' da' zed lo' ciuda nga.

21 Na' chosolo'ede' costumbr da' bi de l_{sens} gao' chio' naccho be_{ne}' Roma.

22 Nach be_{ne}' ca' lo' ciudan' gosase' contr Pablon' len Silasen', na' be_{ne}' gwnabia' ca' gosone' mandaw goselechje' xagaque' cont goseyine' legaque' xis.

23 Beyož goseyinchgüe' legaque' nach bosoži'e legaque' ližya, chese'e ben' chape' ližyan' gw_{na}'ya_{ne}' legaque' cont bi yesyechoje'.

24 Beyož gose'e le' ca', nach bži'e legaque' lo' quart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

25 Ca' gosenita' Pablon' len Silasen' ca do chel, chosol güiže' Diosen' na' cheso_{le}' no himno chesonxene' Diosen', na' yezica'chle be_{ne}' ca' zjade ližyan' chosozenague'.

26 Nach zejzenez leca gw_{xo}' na' bsesechguan len yo'o ližyana'. Na' to ši'ize yogo' puert che ližyana' besyaljon na' besyeyež yogo' gden ca' dan' zjanchej ni'a na' be_{ne}' ca' že' lo' ližyan'.

27 Bosbanen ben' chape' ližyan' na' cate' ble'ede' ba zjanyaljo puert ca', la' golj_{te} spada chen' cont yeyot cuine', le bene' xbab ba bosyoxonj yogo' be_{ne}' ca' zjade ližyan'.

28 Nach Pablon' gože'ne' zižje:

—Bibi gone cuino'. Nga zoacze yogo'to'.

29 Nach ben' chap ližyan' gw_{nabe}' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao be_{ne}' ca', le chžebchgüe'.

30 Na' la' bebejte' legaque' lo quart gan' zjajo'en', che'e legaque':

—¿Bi cheya_{la}' gona' cont gata' yela' mban chia' toli toca_{ne}?

31 Nach gose'e le':

—Gwyejnilaže' Xancho Jesucriston', le' na' be_{ne}' lo' yo'o chio', na' gata' yela' mban chele toli toca_{ne}.

32 Nach ben' chape' ližyan' gwche'e legaque' ližen' na' gosoe'lene' le' len be_{ne}' lo' yo'o chen' xtiža' Xancho Jesucriston'.

33 Nach ca hora' ben' chap ližyan' gwdibe' lo güe' che Pablon' na' che Silasen', na' gwdena' jasoe' nis len be_{ne}' lo' yo'o che' ca'.

34 Nach ben' chape' ližyan' beche'e Pablon' len Silasen' liže' bgüe'ej bguagüe' legaque'. Mbalaz zoe' ba chejnilaže' Diosen' txen len be_{ne}' lo' yo'o che'.

35 Cate' ba gwyeni' be_{ne}' gwnabia' ca' gosesele' xa'ag jaseže' ben' chap ližyan' yosane' be_{ne}' ca' šjaya'aque'.

36 Nach le' gože' Pablon':

—Be_{ne}' gwnabia' ca' bač gosesele' rson yosana' le'e. Guac yeyejle to šagüe' to güen.

37 Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' be_{ne}' nación Roma. ¿Na' chesone' xbab yososane' neto' šižize? Bi gac, san yesid cuine' yesyebeje' neto'.

38 Nach xa'ag ca' jasyeyeže' be_{ne}' gwnabia' ca' can' gož Pablon' legaque'. Na' be_{ne}' ca' besežebe' cate' gosenezde' Pablon' len Silasen' zjanaque' be_{ne}' nación Roma.

³⁹ Nach be_{ne}' gwnabia' ca' ja'aque' gan' zjade Pablon' len Silasen' na' gosata'yoede' lega_{que}' yesyezi'xene' can' ba goquen', na' diža' šagüe' gose'e lega_{que}' yesyechoje' yesyeya'aque' lo ciudan'.

⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chach laže' be_{ne}' ca' chesonxene' Jesucriston' na' beyožen' besyeya'aque'.

17

Be_{ne}' Tesalónica ca' gosone' contr Pablon'

¹ Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyežine' to ciuda da' nzi' Tesalónica gan' zoa to yodao' che be_{ne}' Israel.

² Na' Pablon' ca' costumbr che' gwyeje' yodao' ža che Dios. Na' ca' goc, šone ža che Dios be'lene' lega_{que}' diža'.

³ Bzejni'ide' lega_{que}' gože'ne' be_{ne}' ca' goso'e xtiža' Diosen' can' bosozoje' xtiža' Criston'. Gosene' ben' sela' Dios yedenabi'e, cheyala' yosoči yososaca' be_{ne}' le' na' yesote'ne' na' techle yeyas yebane' ladjo be_{ne}' guat ca'. Gože' be_{ne}' Tesalónican':

—Jesúsen' ben' choa' diža' che', le'na' Criston' ben' gwsela' Dios cont nabi'e.

⁴ Nach bal be_{ne}' Israel gosejle'e xtiža' Pablon' len Silasen' na' gosa_{que}' txen len lega_{que}', na' lecze zan be_{ne}' griego be_{ne}' chesonxen Diosen' na' zan no'ole blao lecze gosejle'e.

⁵ Perw gwnita'ch be_{ne}' Israel be_{ne}' bi chesejle'e xtiža' Diosen'. Lega_{que}' gosacxi'ede' Pablon' len

Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo ciudan' ja'aque' liž ben' le' Jasón chesacde' yesyebeje' Pablon' len Silasen' liže'na'.

⁶ Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosože' Jasónna' len yebał bene' chesonxene' Jesuscriston' na' goseche'e legaque' lao bene' ca' chesenabia' ciudan', na' bososye'e gosene':

—Bene' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga.

⁷ Jasón ni ba blebe' legaque' ližen', na' bi chesone' can' ža ley che César ben' nac la'zelagüe bene' gwnabia' chechon' chi' ciuda Roman', na' chesene' zoa yeto rey bene' le Jesús bene' nabi'e chio'.

⁸ Na' cate' gosende' diža'na', bene' lo ciuda ca' len bene' gwnabia' chegaque' ca' gosebecche' žaš.

⁹ Nach Jasónna' len bene' lježe' ca' bosožie' mechw cont bene' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

Pablon' len Silasen' ja'aque' yež Berea

¹⁰ Nach že'na' bene' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che bene' Israel ca'.

¹¹ Na' bene' Israel ca' že' Berean' zjanacche' bene' šagüe' cled ca bene' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na'

tža tža besyeyiljue' gan' nyoj da' ca' bosozejni'i bene' ca', cont yesenezde' še le can' žan.

¹² Na' zane' gosejle'e xtiža' Xancho Jesucriston' na' lecze zan bene' griego ca' na' zan no'ole blao.

¹³ Nach bene' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lecze gosone' contr Pablon'.

¹⁴ Perw na' bene' Berea ca' chesejnilaže' Jesucriston' la' bososa'te' Pablon' gwyeje' cho'a nisdao'. Na' ca' nac Silasen' len Timoteon', legaque' besyega'ane' Berean'.

¹⁵ Na' to chop bene' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lecz šja'aque' cate gan' zoe'na'.

Pablon' bsed blo'ede' bene' Atenas ca'

¹⁶ Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l' gua'a lsaca' da' chesejnilaže' bene' ca'.

¹⁷ Da'nan' bzejni'ide' bene' Israel ca' lo' yodao' chegaque'na' len yezica'chle bene' ca' chesonxene' Diosen'. Na' yogo' ža gwyeje' ga chac ya'a je'e xtiža' Diosen' len bene' ca' že'na'.

¹⁸ Nach bene' ca' že'na' gwzolao chesoe'lene' le' diža'. Baļe' chesejle'e dan' bzejni'i to bene' le' Epicuro, na' yebaļe' chesejle'e dan' bosozoj bene' ca' chesene' estoico. Na' baļe' gosene':

—¿Bin' chon ža benga?

Na' yebale' gosene':

—Chacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesúsen' na' ba be'e diža' Jesúsen' bebane' ladjo bene' guat.

¹⁹ Nach goseche'e Pablon' to latje dan' nzi' Areópago gan' chesedobe bene' blao čhegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'.

²⁰ Biña' yeneto' diža' can' nac dan' cho'o nga na' chaclaže'to' nezeto' bi zejen yogo' da' ca'.

²¹ Ca nac bene' Atenas ca', de costumbr čhegaque' yogo' ža con chesaše' cheso'e diža' o chosozenague' che bi da' cobe da' de, na' lecz ca' cheson no bene' zito' že' Atenas.

²² Nach Pablon' gwzeche' gachol legaque' gan' chesone' yela' güexi'a na' gože' legaque':

—Le'e bene' Atenas, chache'eda' leca chejni-laže'le zan l gua'a lsaca'.

²³ Cate' gwdia' tnez ble'eda' gan' chonxenle zan l gua'a lsaca', na' ble'eda' to latje gan' nyojen žan: “Che Xancho ben' nono nombia'.” Na' ca nac ben' chonxenle sin cbi nombia'lné', che benan' chyixjue'eda' le'e.

²⁴ 'Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon benachen' cont soe' len chio'.

²⁵ Bibi chyažje Diosen' gwnežjo benachen' le', na' bibi gac yesone' yesaclene' le'. Diosen' cho'e yela'

m̄ban c̄he yogo'lol̄ bene', cho'e legaque' biš grasyw na' cho'e legaque' yogo' bi da' zjanape'.

²⁶ 'Diosen' bene' bene' nechon', na' toz ca nac yogo' beṇaḥ xi'in diaža c̄he'. Na' bsi'e xneze bat n̄ita' to toe' na' ga yesenite'.

²⁷ Diosen' bnite' yogo' beṇaḥen' lo yežlion' cont yeseyiljue' nacle yesone' yesombi'ene' na' yesonx-ene'ne'. Na' da' li Diosen' bi zoe' zito' len to to chio'.

²⁸ Le' chone' cont zoacho mbancho na' chdacho. Nac da' li can' gosena to c̄hope bene' poeta c̄hele ben' goso'e diža' xdan, gosene': "Naccho diaža c̄he Diosen'."

²⁹ Na' dan' naccho diaža c̄he Diosen' bi cheyała' goncho xbab nac Diosen' ca no l̄gua'a lsaca' de oro, de plata o de yej. Chesaljšlaže' beṇaḥen' chesone' da' ca'.

³⁰ Cani' Diosen' be'e latje goson beṇaḥen' con ca gwna xbab c̄hegaque' yela' cbi chejni'i c̄hegaque', perw na'a Diosen' chone' mandadw yogo'lol̄ bene' že' doxen yežlion' yesebejyichje' da' malen' chesonen'.

³¹ Diosen' chaclaže' cuejyichjcho da' malen', le ba mbeje' Jesucriston' gone' yela' justis c̄he yogo' beṇaḥ na' gwnežjue' castigw c̄he yogo' bene' cbi chesejnilaže' le', na' Diosen' zejczze' to licha dan' gone' ca'. Na' Diosen' ba nžie' bia' bat gone' yela' justis c̄he beṇaḥ. Na' dan' bosban Diosen' Jesucriston' ladjo bene' guaten', nezecho Jesucristwnan' gone' yela' justis c̄he beṇaḥen'.

³² Cate' bene' Atenas ca' beyož gosende' gwna Pablon' yesyeban bene' guat ca', bałe' gosezi'diže' le' na' yebałe' gose'ene':

—Na' gwzenagto' xtižon' yeto ža yoble.

³³ Can' goc beza' Pablon' latje gan' že' beṇe' ca'.

³⁴ Perw baḷ beṇe' Atenas ca' gosaque' Pablon' txen na' gosonxene' Jesucriston'. Na' beṇe' ca' gosaque' Pablon' txen len to beṇe' byo le Dionisio na' yeto no'ole le Dámaris. Na' Dionision' naque' txen len beṇe' gwnabia' ca' ben' cheson yela' güexi'a gan' nzi' Areópago.

18

Ca goc šlac zoa Pablon' Corinto

¹ Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto.

² Cate' bžine' Corinton' bežague' to beṇe' Israel le' Aquila beṇe' naque' beṇe' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca' hora' doxen gan' mbane naciónna', bene' mandadw besyežaš yogo' beṇe' Israel ca' že' ciuda Roma. Nach Pablon' gwyeje' jaṇe'e Aquilan' len Priscilan'.

³ Xšingaque' naquen chesone' yo'o de lache', na' toze ca' nac xšin Pablon'. Nach bega'ane' gosenite' txen na' gosone' žinṇa' txen.

⁴ Na' yogo' ža che Dios Pablon' gwyeje' yodao' che beṇe' Israel ca' jazejni'ide' legaque' che Jesucriston', cont baḷ beṇe' Israel len baḷ beṇe' bi zjanac beṇe' Israel yesejnilaže'ne'.

⁵ Nach Silasen' len Timoteon' gwde gosa'aque' distritw Macedonian' besežine' gan' zoa Pablon', na' cana'ch Pablon' bsane' xšinen' cont gota'ch latje gwdixjue'ede' xtiža' Jesúsén' na' bzejni'ide' beṇe' Israel ca' Jesucristwnan' naque' beṇe' chesebeze' sela' Diosen' yedenabi'e.

6 Perw be_{ne}' Israel ca' beseže'e Pablon' na' bosože' yela' ya' che'. Nach Pablon' gwšibe' xe'na' cont blo'e chbejyichje' lega_{que}', gwne':

—Bibi do_{la}' napa' dan' cuiayi'le to_{li} toca_{ne}. Le'e nape do_{la}'. Na' na'a šjased šjalo'eda' be_{ne}' ca' bi zjanac be_{ne}' Israel.

7 Nach bechoje' lo' yodao'na' na' beze'e bežine' liž to be_{ne}' le Justo. Justo na'na' zoe' chonxene' Diosen' na' liže' zoan cuit yodao'na'.

8 Na' to be_{ne}' le' Crispo naque' be_{ne}' gwnabia' che yodaon'. Na' Crispon' len yogo' be_{ne}' lo' yo'o che' gosaque' txen chesejle'e che Xancho Jesucriston'. Na' yezan be_{ne}' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis.

9 Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize.

10 Neda' zoa' len le' na' bi go_{na}' latje no gone le' da' mal, le be_{ne}' zan že' lo' ciuda nga be_{ne}' chesonxene' neda'.

11 Ca' goquen' bega'an Pablon' Corinton' tgüiz yogašje bsed blo'ede' lega_{que}' xtiža' Diosen'.

12 Na' ca tiempen' ben' le Galión naque' gobernador distritw gan' nzi' Acaya. Nach be_{ne}' Israel ca' nita' ciuda Corinto be_{ne}' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gobernadores' yela' justisen'.

13 Na' cate' besežine'na' gose'e gobernadores':

—Benga chde' chgo'oyele' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

¹⁴ Baḥ zoa ne Pablon' cate' gobernador Galiónna' gože' bene' Israel ca':

—Ca nac xya dan' chagwle nga, šaca' naquen to da' xinj o to da' malchgua, gonan' yela' justis.

¹⁵ Perw naquen che diža', na' che bene', na' che ley chelen'. Da'nan' le gwye' nacle gonle. Bi co'o lo na' gona' yela' justis che dan' nac ca'.

¹⁶ Nach bešaše' legaque' gan' chone' yela' justisen'.

¹⁷ Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gobernador Galiónna', perw bena' bibi cuent bene' legaque'.

Pablon' beyeje' Antioquían' da' yoble

¹⁸ Na' bega'anḥ Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': “Nayežagcho”, nach beze'e txen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' baḥ beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria.

¹⁹ Na' cate' besyežine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba zjandob na' xtiža' Dios.

²⁰ Na' bene' ca' že' lo' yodaon' gosata'yoede' le' yega'anche' len legaque', perw bi gocláže'.

21 Nach gože' legaque':

—Nayežagcho, le chonen byen soa' lni dan' šo' ciuda Jerusalénna', perw güidchcza' dena'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'.

22 Cate' bežine' ciuda Cesarean' bechoje' lo' barcon' na' gweje' Jerusalénna' na' bguape' tiox beņe' ca' chesedop chesežag chesonxene' Jesucriston'. Nach beze'e beyeje' ciuda Antioquían'.

23 Gwde to tiemp zoe' Antioquían', nach gwze'e da' yoble gweje' to to yež dan' nita' distritw Galacia na' Frigia, bene' chač laže' beņe' ca' chesonxene' Jesucriston'.

Apolos gwduxje'ede' xtiža' Diosen' ciuda Efeson'

24 Na' ca tiemp na' bžin to beņe' Israel ciuda Efeson' beņe' le Apolos. Naque' beņe' ciuda Alejandría. Le' chac cho'e diža' güen lao yogo' beņe', na' ba nsede' binlo doxen Xtiža' Diosen' dan' nyoj.

25 Apolosen' chejle'e dan' bzejni'i Juanna' che Xancho Jesúsén' na' nezde' can' bzoe' beņe' nis caten' besyetinjde' xtoła'gaquen'. Na' Apolosen' be'e diža' do yichj do laže' bzejni'ide' binlo che Jesúsén', la'czla' con dan' bsed blo'e da' Juan na'zen' nezde'.

26 Nach Apolosen' gwzolao be'e diža' che Xancho Jesucriston' lo' yodao' che beņe' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejiže' le' na' bosozejni'ichde' le' che Jesucriston' da' ca' biņa' nezde'.

27 Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' be_{xue}' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nži'ilaže' bene' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan legaque'.

28 Bzejni'ide' yogo'lol bene' gože'ne' clelen' cheson bene' Israel gualaž chen' bi chesejle'e che Jesús'en'. Bzejni'ide' legaque' can' nyoj Xtiza' Diosen' žan Jesús'en' naque' Cristo ben' chesebeze' yedenabi'e.

19

Šlac gwzoa Pablon' ciuda Efeson'

1 Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bal bene' chesonxene' Jesucriston'.

2 Na' gože' legaque':

—¿Zedeso_a Spiritw che Diosen' lo' yichjlažda' olen' caten' gwzoloa chejnilaže'le Jesucriston'?

Nach gose'e le':

—Bi nezeto' še zoa Spiritw che Diosen'.

3 Nach Pablon' goze'e legaque':

—¿Bi dižan' chejle'le da' gwzoale nisen' še ca'?

Nach gose'e le':

—Gwzoato' nis can' bzejni'i da' Juanna'.

4 Nach gož Pablon' legaque':

—Da' Juanna' bzoē' beñe' nis cate' besyētīnje xtolā'gaque' na' lecze gože' legaque' cheyała' yesonxene' bena' za' seła' Diosen'. Na' da' gwne' ca' be'e diža' che Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsēn'.

⁶ Nach Pablon' gwxoā ne'ena' yichj to toe' na' Spiritw che Diosen' gwzoan lo' yichjlaždao' to toe', nach gosēne' diža' da' cbi chesejni'ide' na' goseyixjue'ede' bi dan' gož Diosen' legaque'.

⁷ Na' yogo' beñe' ca' zjanac ca do šižīnue'.

⁸ Na' do šone bio' Pablon' bsed blo'ede' beñe' ca' chesedop chēšēžag lo' yodao' che beñe' Israel ca' dan' zoa Efeson'. Bi bžebe', na' bzejni'ide' legaque' na' gwñeyoede' legaque' yeson cuingaque' lo' na' Diosen' cont nabi'e legaque' len xbab chegaquen'.

⁹ Na' bchoj bał beñe' güedenag beñe' chi chesejle'cze', na' lao beñe' ca' že' yodao'na' gosēne' diža' ya' che xtiža' Jesucriston' dan' chzejni'i Pablon'. Da'nan' Pablon' bechoje' gan' že' beñe' ca' na' bebeje' ben' ba chesonxene' Jesúsēn' na' gwche'e legaque' gan' zoa to yo'o xen che to beñe' le' Tiranno na' bzejni'ide' legaque' yogo' ža.

¹⁰ Na' gwzōa Pablon' chop iz bzejni'ide' beñe' ca', na' can' goc, yogo' beñe' že' distritw Asia gosende' xtiža' Xancho Jesúsēn', beñe' zjanac beñe' Israel lente beñe' bi zjanac beñe' Israel.

¹¹ Na' Diosen' bchine' Pablon' cont bene' yela' guac da' besyebanchgüe beñe'.

¹² Na' jasesane' no bay no lache' da' ba bchēlen Pablon' gan' zjade beñe' güe' na' la' chesyeyactedē'

bi yižgüe' chese'ede', na' bene' ca' yo'o nyaz da' xigüe' yichjlažda'ogaque'na' lecze besyechojen.

13 Lecze chesaš bal bene' Israel chesybeje' da' xigüe' da' zjajo'o lo' yichjlaždao' bene' na' gosaclače' yosočhine' la Xancho Jesúsén' cont yesybeje' da' xigüe' ca', nach gose'e da' xigüen':

—Len yela' chnabia' che Jesúsén' ben' choe' Pablon' xtiže'na' chonto' mandadw yechojle.

14 Na' zoa to bxoz gwnabia' che bene' Israel le' Esceva, na' nita' gaže xi'ine'. Na' bene' quingan' bosočhine' la Jesúsén' gosaclače' yesybeje' da' xigüen'.

15 Nach goc to šlas chesone' ca' cate' to da' xigüen' boži'in xtižen', gožen legaque':

—Nombi'a Jesúsén' na' ba benda' diža' che Pablon', perw bi nombi'a le'e cont šejli'a xtiža'len'.

16 Nach bena' yo'o nyaz da' xigüen' bxite' gwnize' bene' ca' betlate' legaque' na' gwcheze' xalana'gaque'. Nach bosyoxonje' liž bena' ga'alyide' na' bedo chen zjanaque' dan' bene' legaque' zi'.

17 Na' goslas diža' can' goquen' gosenezete yogo' bene' že' Efeson', bene' Israel lente bene' chi zjanac bene' Israel. Nach yogüe' besežebe' na' gosache'ede' Xancho Jesúsén'naque' bene' zaque'.

18 Nach bene' zan ba chesejle'e xtiža' Xancho Jesúsén', na' zane' gosexoadole' lao bene' ca' chese-dop chesežag chesonxene' Jesucriston' cheso'e diža' che da' malen' ba gosone'.

19 Na' bene' ca' gosac bene' guaža' na' bene' güene ya'a bosyotob libr chegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besybeje' cuent ca do gaca'te' zaca'

libr ca' na' bžinen šiyon mil mechw plata, na' to to mechw plata ca' zacan' do tža žin.

²⁰ Can' goc, beņe' zan gosende' xtiža' Xancho Jesucriston', na' gwyanch beņe' bosozenague' che'.

²¹ Nach gwde goc da' ca' Pablon' bene' xbab yeyeje' Jerusalėnna', na' goclaže' yedie' šjayne'e beņe' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalėnna' lecze cheyała' šjeje' ciuda Roma.

²² Na' gwleje' chope beņe' chesonlene' le' xšin Diosen' na' gwsele' legaue' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

Bene' ca' besegue'ede' Pablon' gosebecchgüe' da' zed ciuda Efeson'

²³ Na' gwche' to da' zed gual ciuda Efeson', le nita' beņe' beseže'e xtiža' Jesúsēn' dan' bsd blo'e Pablon'.

²⁴ Quinga goc: gwzōa to beņe' le' Demetrio beņe' chon yodao' dao' de plata da' naquen ca nac yodao' gan' zōa xonax Diana ben' chesonxene'. Na' beņe' ca' gosonlene' žinna' gosonchgüe' gan, le gwda'ochguan.

²⁵ Nach btobe' beņe' ca' goson žin txen len le' na' nochle beņe' goson žin dan' nac ca', na' gože' legaue':

—Nezele ca nac žin dan' nlancho choncho nga, chonlenchon gan xen.

²⁶ Na' ba beneczele na' ba ble'eczele can' chon to beņe' le Pablo chsed chlo'ede' beņe' lo ciuda Efeso checho nga na' lecze chsed chlo'ede' zan beņe' že' doxen distritw Asia nga, che'e legaue'

bibi zaca' l̄ gua'a l̄saca' da' cheson beṇaḥen' cont chesejnilažen'. Na' beṇe' zan ba chosozenague' ḥe' na' chesebejyichje' dan' chejnilaže'cho.

²⁷ Le gonšc xbab nacle goncho, le xož yesene' ḥe žin dan' choncho nga, na' gague lezen, san lecz xož yesone' cont yodao' ḥe xonax Diana ḥechon' yega'anen ca to da' bibi zaca' na' len yela' chze na' yela' zaca' ḥe xonaxen'. Na' nezele ca nac xonax Diana ḥechon', yogo'cze beṇe' distritw Asia nga na' beṇe' gate'tezechle chesonxene' le'.

²⁸ Beyož gosende' xtiža' Demetrion' beseloc-
chgüe' na' bososye'e gosene':

—Leca beṇe' zaca' xonax Diana ḥe chio' beṇe' Efeso.

²⁹ Nach gwche' da' zed doxen lo ciudan', na' gosaque' toze' jaseṇize' ḥhope beṇe' distritw Macedonia beṇe' gosaque' txen len Pablon', toe' le Gayo na' yetoe' Aristarco. Na' gosexobe' legaque' be-sežine' gan' chesedobe yogo' beṇe' lo ciudan'.

³⁰ Na' Pablon' goclaže' šo'e gan' zjandobe beṇe' ca' cont güe'lene' legaque' diža', perw beṇe' ca' chesonxene' Jesucriston' lo ciudan' bi goso'e latje šo'e.

³¹ Bał beṇe' zjanaque' beṇe' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe beṇe' ca'.

³² Na' beṇe' ca' zjandoben' gosone' sšag juisyw. Gwde gwdele bososya'a to toe'. Na' beṇe' zan bi zjanezde' biḥen' zjandobe'na'.

³³ Beṇe' Israel ca' bosožigue' to beṇe' le Alejandro lao beṇe' ca' že'na' cont be'lene' legaque' diža', na' bosozejni'ide' le' bin' cheyala' ne'. Na' Alejandron'

gw̄lis ne'e cont gw̄nabe' nite' šize yosozenague' diža' dan' güe'e laogaquen' gwzoe' rson che bene' ca' chesejnilaže' Jesucriston'.

³⁴ Perw cate' besele'ede' le' gosacbe'ede' lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

³⁵ Na' bene' güezoj chegaquen' cane goc bebecžie' legaque'. Na' gože'ne':

—Le'e bene' gualaž, yogo' bene' že' doxen yežlion' zjanезде' naquen checho gapši'icho yodao' che xonax Dianan'. Naque' bene' zaque', le l gua'a lsaca' chen' blažon' le'e yaba.

³⁶ Na' nono gac na da' yoble. Da'nan' le soa šize na' bich gonle da' bi zejen.

³⁷ Na' ca nac bene' quinga nche'ele nga, bibi na' yesebane' lo' yodao' checho ca' na' neca nacho chosožie' yela' ya' che xonax Diana chechon'.

³⁸ Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaque' part še ca'.

³⁹ Na' še bichle da' chnable gac, cheyala' goncho to yela' güexi'a cont choglaon.

⁴⁰ Perw ca nac žaš da' nga chac na'a, xož бага'cho choncho contr gobiern can' že'cho nga, na' bibi de ye'gacchone' še yesenabe' bixchen' goc žaš da' nga chac na'a.

⁴¹ Beyož gože' legaque' ca' bene' mandadw besyežaše'.

20

Pablon' gwyejche' distritw Macedonia na' nación Grecia

¹ Nach cate' beyož gwche'ži da' zeden', Pablon' goxe' be_{ne}' Efeso ca' chesonxen Jesucriston' cont ja'aque' gan' zoe'na' na' bene' chach laže'gaque' cont yesenite' yesejnilaže' Jesucriston'. Nach gože' legaque': “Nayežagcho”, na' goseye_{la}' lježe' na' beze'e beyeje' da' yoble distritw Macedonia.

² Na' gwdie' to to yež da' zjachi' ga_{la}'ze Macedonian' bene' chach laže' be_{ne}' ca' chesonxene' Jesucriston', na' beyožen' gwyejche' nación da' nzi' Grecia.

³ Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwnezde' zjachi'nao' be_{ne}' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le.

⁴⁻⁵ Na' xonj be_{ne}' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale be_{ne}' ca': Sópater, be_{ne}' yež Berea, na' Aristarco len Segundo ben' zjanac be_{ne}' ciuda Tesalónica, na' Gayo be_{ne}' yež Derbe, na' Timoteon' na' chope be_{ne}' za'ac distritw Asia, Tíquico len Trófimo.

⁶ Na' gwde l_{in}' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' be_{ne}' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

7 Na' cate' bžin ža dmi^gw besedobe be^{ne}' ca' chesonxene' Jesucriston' lo ciuda Troasen' na' gweyeto' güe'ej gwdagwto' txen len lega^{que}', na' Pablon' bzejni'ide' lega^{que}' xtiža' Diosen'. Na' dan' ba zoa yeza' Pablon' ca gw^xeze nach be'e diža' bžinte do chel.

8 Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara.

9 Na' to bi' güego' lebe' Eutico žiabe' cho'a ventan. Na' Pablon' toⁿ zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo yo che'ele. Nach cate' besyecose'be' bi' guat besyecose'.

10 Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' be^{ne}' ca':

—Bi žeble, mbanczbe'.

11 Nach Pablon' begüe' da' yoble na' gosagüe' na' bezolagüe' cheyo'e diža' len lega^{que}'. Ne' choe'te' dižan' ca' cate' gwyeni'. Nach beze'e.

12 Nach bi'na' blažo' cho'a ventanna', be^{ne}' ca' že'na' besyeche'ebe' besyebechgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

13-14 Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwoyo'e lo' barcon' txen len neto'. Nach gweyeto' ciuda gan' nzi' Mitilene.

15 Bezsa'to' Mitilenen' na' beteyo bežinto' ga^la'ze to yežlio da' chi' lo' nesdaon' gan' nzi' Quío. Na'

gwde yeto ža bežinto' gan' chi' yeto yežlio lo' nisdaon' da' nzi' Samos. Na' bechojto' lo' barcon' gwyejto' yež dan' nzi' Trogilio gan' bega'anto' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto.

¹⁶ Ca' bento' bi gwdeto' ciuda Efeson', le Pablon' bi goclaže' šede' yež ca' zjachi' do distritw Asian'. Chachbyende' yob žine' Jerusalénna' še gała' soe' na' ža lni dan' nzi' Pentecostés.

Pablon' bšaljlene' bene' chosogüia chesene'e bene' ca' chesonxen Jesucriston' Efeson'

¹⁷ Na' šlac zoato' ciuda da' nzi' Mileto Pablon' goxe' bene' Efeson' bene' chosogüia chesene'e yezica'chle bene' ca' chesonxene' Jesucriston'.

¹⁸ Na' cate' besela'aque' Pablon' gože' legaque':

—Nezele can' bena' caten' gwzoa' distritw Asia gan' zoa lažlen', bena' da' güen šlac gwzoa' len le'e gwzolaotia' ža nechw žan' bžina' na'.

¹⁹ Gwzoa' bena' xšin Diosen' na' bi benxen cuina'. Zan ni'a gwchežchgua' chele. Na' da' zan da' bosochi bososaca' bene' Israel ca' neda'.

²⁰ Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž to tole.

²¹ Bzejni'ida' bene' zjanac bene' Israel gualaž chia' lente bene' cbi zjanac bene' Israel can' chaclaže' Diosen' yesyetinje xtoła'gaquen' na' yesejni-laže' Xancho Jesucriston'.

²² Na' na'a yeya'a Jerusalén, le Spiritw che Diosen' chonen byen yeya'a, na' bi nezda' bin' gac chia' yežina' na'.

23 Con neza' to to yež gan' ba bedia' Spiritw che Diosen' ba bzejni'in neda' doła' gata' ližya na' gac bichle da' saca'zi'a.

24 Perw bi chi' yichja' che da' ca' saca'zi'a. La'czla' še yesote' neda', chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nži'ilaže' Diosen' beŋačen'.

25 'Ca nac le'e, ba bzejni'ida' le'e che yela' chn-
abia' che Diosen', perw na'a ne tole bich le'ele
neda'.

26 Da'nan' chnia' le'e bibi doła' napa' še nole
cuiayi'.

27 Bač bzejni'ida' le'e yogo' dan' chaclaže'
Diosen' nezele, bibi bcuaša'.

28 Da'nan' cheyla' cuec yichjle che yogo'lol dan'
ba bzejni'ida' le'e na' lecze ca' le gwsed le gwlo'e
yezica'chle beŋe' chesedop chesežag chesonxene'
Xancho Jesucriston' cont yosozenague' che dan'
ba bzejni'ida'. Le gon ca' le Spiritw che Diosen'
ba gwlejen le'e cont gwzejni'ile yezica'chle beŋe'
chesonxene'ne'. Jesucriston' bnežjw cuine' bedelaj
xchene' beque'e xtoła'chon' cont bozoe' chio'
binlo len Diosen' da' yoble.

29 Neza' cate' bich zoa' len le'e yesela'ac beŋe'
yese'nde' yesexoayague' le'e cont cuejyichjle bich
gwzenagle che Jesucriston'.

30 Ladjw le'e yesechoj beŋe' yososed yosolo'ede'
diža' güenlaže' gualaz da' yososed yosolo'ede' diža'
li. Yesone' ca' cont ga'ole dan' yososed yosolo'e
legaue'.

³¹ Da'nan' le gwsaca' cont nono yesexoayag le'e. Na' le gon xbab, le šon izen' ba gwzoo' bzejni'ida' le'e na' gwneyoeda' le'e do ža do yel gwchežtia' chele.

³² 'Na' na'a bene' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenle Diosen' txen len yezica'chle bene' ba gwlej Diosen' zjanaque' lo ne'e.

³³ Bi chzelaža' bi da' de che bene', neca chzelaža' xmechwgaque' na' neca xagaque'.

³⁴ Nezczele can' bena' žin cont bžel da' byažjda' len da' beseyažje bene' ca' gosenite' len neda'.

³⁵ Na' bena' žinna' ca' cont blo'eda' le'e cheyla' gaclencho bene' še bi cheseyažjde'. Na' šjasa'laže'le can' gwna Xancho Jesúsen': "Mbalazech zoacho caten' chnežjwcho bi dan' chnežjwcho bene' clal ca caten' chesone' chio' bi dan' chesone' chio'."

³⁶ Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'.

³⁷ Na' yogo'lole' gosebeže' che Pablon' na' goseyele' le' na' bosonope' ne'ena'.

³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

21

Pablon' beyeje' Jerusalén

¹ Beyož bze diža' lježto' len bene' ca' nach beyo'oto' lo' barcon' na' zjaydato' licha bžinteto' gan' chi' to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon'

da' nzi' Rodas, nach bezsa'to' bežžinto' ciuda Pátara.

² Na' cate' bežžinto' Pátaran' bželeto' yeto barcw dan' chzan' šejen distritw Fenicia, na' beyo'oto' lo'enna'.

³ Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bežžinto' ciuda gan' nzi' Tiro besyeletje' yoa' da' zonsa' barcon' na' neto' bechojto' lo' barcon'.

⁴ Na' jaydiljwto' beņe' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šeje' ciuda Jerusalenna'.

⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' bol güižto' Diosen' cho'a nisdaon'.

⁶ Beyožen' bze diža' lježto' na' gwdeļa' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

⁷ Na' beza'to' ciuda Tiron' bežžinto' gan' že' ciuda Tolemaida. Nach beyetjto' lo' barcon' jayna'to' beņe' ca' chesonxene' Jesucriston' lo' ciuda Tolemaidan' na' bega'anlento' legaque' tža.

⁸ Na' beteyo beza'lento' Pablon' na' bežžinto' Cesarean' na' jayga'anto' liž Felipe ben' naque' txen len beņe' ca' yexop ben' chesaclene' postlw ca' len žin bixjw da' gota'. Na' Felipen' zoateze' cho'e diža' che Jesucriston'.

⁹ Felipen' nita' tap xi'ine' no'ol güego' na' chosozende' beņe' bi dan' ba gož Diosen' legaque'.

10 Zan ža ba gwzoato' liž Felipen' cate' bla' to be_{ne}' distritw Judean' be_{ne}' le Agabo, le_{ce} chaque' chzende' be_{ne}' bi dan' ba gož Diosen' le'.

11 Nach Agabon' gw_nabe' xpant Pablon' na' b_{che}jen' ni'a ne'e, na' gože' neto':

—Spiritw che Diosen' ba bzenen neda' be_{ne}' Israel ca' že' Jerusalén_{na}' yoso_{che}je' ni'a na' ben' nac che' bant nga na' yesone' le' lo na' be_{ne}' ca' bi zjanac be_{ne}' Israel.

12 Cate' beyož beneto' can' gwna Agabon', neto' len be_{ne}' Cesarea ca' gota'yoeto' Pablon' bi šeje' Jerusalén_{na}'.

13 Nach Pablon' gwne':

—Bi cuežle chia' o gon_{le} ga soayaša'. Chzane cuina' yoso_{che}je' neda' na' yesote' neda' Jerusalén_{na}' dan' chyixjue'eda' xtiža' Xancho Jesúsén'.

14 Na' cate' gocbe'eto' bibi gac gonto' cont cbi šeje' ciuda Jerusalén_{na}', nach bich bi gožto'ne', con gwnato':

—Gac con can' ža Xan_{ch}on'.

15 Nach bsini'ato' beza'to' zjaydato' Jerusalén.

16 Na' to chope be_{ne}' Cesarean' be_{ne}' chesonxen Jesucriston' gosa'aque' txen len neto', na' gose_{che}'e neto' liž to be_{ne}' le Mnasón. Bena' ba goc sša chonxene' Jesucriston'. Naque' be_{ne}' Chipre, perw ba zoa liže' Jerusalén_{na}'. Na' ba bosoxi'e soato' liže'na'.

Pablon' bežine' Jerusalén_{na}' ja_{ne}'e Jacobon'

17 Na' cate' bežinto' ciuda Jerusalén_{na}' be_{ne}' lježto' ca' že'na' besyebede' bosoguape' neto' tiox.

18 Na' beteyo gwyejlen^{to}' Pablon' jana^{to}' Jacobon', na' bžinto^{na}' ba zjandop zjanžag yogo' be^{ne}' blao ben' chosogüia chese^{ne}'e yezica^{chle} be^{ne}' ca' chesonxene' Jesucriston' na'.

19 Nach Pablon' bguape' lega^{que}' tiox na' be-
yožen' be^{lene}' lega^{que}' diža' doxen can' ba ben
Diosen', le zan be^{ne}' bi zjanac be^{ne}' Israel ba
chesonxene' Jesucriston' gan' ba gwyeje' je^{lene}'
lega^{que}' xtiža' Diosen'.

20 Na' cate' bosozenague' dan' gož Pablon'
lega^{que}', nach goso'e yela' choxc^{len} che Diosen'
na' gose'e Pablon':

—Be^{ne}' migw, ne^{zdo}' zan mil be^{ne}' Israel gualaž
checho ca' ba chesonxene' Jesucriston' na' yogüe'
chesacde' chonen byen goncho yogo' da' ca'
zjanyoj le'e ley chechon' dan' bzoj Moisés.

21 Na' zane' ba zjanende' chsed chlo^{edo}' be^{ne}'
Israel gualaž chechon' nita' laž be^{ne}' zito' bich
cheyala' yesone' can' ža le'e ley chechon' na' bi
yesezoa' xi^{ingaque}' ca' señw dan' že' circuncisión.

22 ¿Nacxe ye^{to}' lega^{que}'? le zane' yesežag nga cate'
yesende' ba^{ch} zo' nga da' yoble.

23 Güen goncho quinga: nita' tap be^{ne}' nga
be^{ne}' zoa to da' zjango'o cho'en lao Diosen' na'
chesaclaže' yesone' can' gosenen'.

24 Na' cheyala' chi'o lega^{que}' yodao' blaon' na'
gono^{ne}' txen chixjo' beyixe' ca' gwnežjwle bxozen'
gote' cont yexi' yeyachle can' ža leyna'. Na'
yeyožen' gac yosošib yichjga^{que}' can' zjango'o
cho'en. Gono' ca' len lega^{que}' cont yogo' be^{ne}'
yesacbe'ede' bi chzo' ley chechon' to šla'ale can'
chesenen', san chono' can' žanna'.

25 Na' ca nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l gua'a lsacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

Gosezene' Pablon' yodao' blaona'

26 Beteyo gwza' Pablon' gwche'e bene' ca' tap cont yesyexi yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa bxozen' gwduxjue'ede' le' bi ža yañen' yeyož yesaque' xi'laže' cont yosonežjue' beyix'e ca' gote' che to to legaque'.

27 Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' bal bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'.

28 Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

29 Gosene' ca' neche da' besele'ede' Pablon' lo' ciudan' chdalene' to bene' ciuda Efeso le' Tróximo, na' gosacde' še Pablonan' gwche'e le' lo' yodao'na', la'czla' bi bene' ca'.

³⁰ Na' gosonchgüe' to žašyey. Ła' besedobte bene' zan cho'a yodaon' na' goso'e lo' yodaon' gosenize' Pablon', besyebeje' le' na' la' bosyosejwte' puert ca'.

³¹ Na' ba zoa yesote' le' cate' gwneze ben' yo'o lo' ne'e soldadw che nación Roma ben' že' lo' ciudan'. Cate' gwnezde' ba chac to žašyey juisyw doxen ciudan',

³² nach btobe' soldadw ca' len bene' gwnabia' chegaque' ca', na' gosa'aque' zja'acsesse' gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'.

³³ Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw che' ca' Pablon' na' bosocheje' le' chope gden. Nach gwñabde' bene' ca' že'na' no nac Pablon' na' bi bene'.

³⁴ Na' bene' ca' že'na' bososya'adie', gwde gwdele chesena to toe'. Na' gwde chi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw goseche'e Pablon' cuartel.

³⁵⁻³⁶ Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen soldadw ca' Pablon' neche dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

Pablon' be'lene' bene' zan ca' diža'

³⁷ Bač cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Gono' latje gua' to chope diža'?

Nach bena' gože'ne':

—¿Chaco' diža' griego?

³⁸ ¿Bi naco' beņe' nación Egipto ben' gwda btob tap mil beņe' güet beņe' bat ngaze na' gwche'e legaque' latje dašen' gan' chesone' contr gobier-nen'?

³⁹ Nach Pablon' gože'ne':

—Gague benan' neda'. Neda' naca' to beņe' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beņ latje güe'lena' beņe' quinga diža'.

⁴⁰ Nach bena' bnežjue' latje. Nach Pablon' gwzeche' lo nepen' bene' señw len ne'e cont beņe' ca' že'na' gosenite' šize bosozenague' che'. Nach gwzolaküe' be'e diža' len legaque' diža' hebreo.

22

¹ Gože' legaque':

—Beņe' gole len beņe' xcuide', le gwzenag diža' dan' gua' laole nga.

² Na' cate' gosache'ede' chne' legaque' diža' hebreo gosenite' šize. Nach Pablon' gože' legaque':

³ —Neda' naca' beņe' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley che da' xozxta'ocho ca'. Na' gocda' chonchgua' can' chazlaže' Diosen', cayanen' chaque le'e za'acle nga na'a.

⁴ Na' bchi bsaca' zan beņe' ca' chesejnilaže' Jesucriston', goclaža' gotto' legaque'. Na' gwxena'

no be_{ne}' byo na' no no'ole chesonxene' le' na' gw_{che}'egaca'ne' ližya.

⁵ B_xoz ben' naquech be_{ne}' blao na' nochle be_{ne}' gole blao ca' chesenabia' nación Israel _{che}chon' zjanezde' can' bena'. Legaque' gosone' yiš dan' be_xua' gwy'a ciuda Damascon' gan' godca' sena' baltez be_{ne}' chesonxen Jesucriston' cont _{che}'egaca'ne' Jerusalén ni par gonto'ne' castigw.

Pablon' cho'e diža' can' goc _{che}' cate' Diosen' bocobe' yichjlažda'ogüe'
(Hch. 9:1-19; 26:12-18)

⁶ Na' šlac zya'a ciuda Damascon' ca do guagwbiž cate' to be'ni' gual da' za' yaba gwyechjen neda'.

⁷ Na' gwbi_xa' lo yon' benda' to be_{ne}' gože' neda': "Saulo, Saulo žbix_{chen}' ch_{chi} chsaco' neda'?"

⁸ Nach boži'a xtižen', goša'ne': "žNo le' be_{ne}'?" Nach gwne': "Nedan' Jesús be_{ne}' Nazaret na' neda' ch_{chi} chsaco'."

⁹ Be_{ne}' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesúsen' neda'.

¹⁰ Nach goša'ne': "žBin' cheya_{la}' gona' Xana'?" Nach Xana' Jesúsen' gwne': "Beyas na' gwyejteze ciuda Damascon', na' cate' žino'na' to be_{ne}' ye'e le' dan' cheya_{la}' gono'."

¹¹ Na' gw_{cho}la' catec gw_{na}'chgua' be'nin', nach be_{ne}' ca' zya'alena' txen goso_xe'de' taca' cont bžinto' Damascon'.

¹² Na' to be_{ne}' le Ananías zoe' ciuda Damascon' ben' chonxene' Diosen' do yichj do laže' na' chzenague' _{che} yogo' ley dan' bzoj Moisésen'. Na' yogo'lo_l be_{ne}' gualaž _{che}cho ca' že'na' cheso'e xtiža' Ananíasen' naque' be_{ne}' chon da' güen.

13 Ananíasna' bide' gan' z oan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'.

14 Nach gože' neda': "Dios ben' chonxencho na' ben' benxen da' xozxta'ocho ca', len' ba gwleje' le' cana'te cont nezdo' can' chaclaže' gono', na' ba ble'edo' Xi'ine' ben' nac la'zelagüe beņe' chon da' güen, na' ba bendo' xtiže'.

15 Nachen' go'o xtižen' len beņe' zan beņe' že' lo yežlion' gwzejni'igacdo'ne' da' ca' ba bendo' na' ba ble'edo'."

16 Na' lecz gož Ananíasen' neda': "¿Bičen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yichjlažda'oguoñ' len da' malen'." Can' gože' neda'.

Diosen' gwleje' Pablon' cont be'e xtižen' len beņe' ca' bi zjanaque' beņe' Israel

17 'Na' gwdena' beyeda' ciuda Jerusalén ni na' gwya'a lo' yodao' blaon' jel güiža' Diosen', na' šlac choļ güiža'ne' ble'edagüeda' Xancho Jesucriston'.

18 Na' Xanchoñ' gože' neda': "Bi šedo' chojo' ciuda Jerusalén ni, le bi yosozenag beņe' quinga xtižo' dan' go'o chian'."

19 Nach goša'ne': "Xana', legaque' zjanezde' neda' gwya'a to to yodao' jet jatina' beņe' ca' chesonxene' le' na' bseyjwgaca'ne' ližya.

20 Na' lecz naca' beņe' ca' txen cate' gosote' Esteban ben' be' xtižon', na' neda' gwña'a xadon chē beņe' ca' gosot le'."

21 Nach Xancho Jesucriston' gože' neda': "Bchoj na' seļa' le' zito' go'o xtižan' len beņe' ca' bi zjanac beņe' Israel."

Pablon' len ben' yo'o lo ne'e soldadw ca'

²² Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezolagüe' chososye'e, chesene':

—Le got bena'. Bich cheyała' bane'.

²³ Bososya'adie' na' beselocchgüe' bosozala' xaque' ca'ale na' gosaše' bište yon' bosozalen' lo be'.

²⁴ Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaže' nezde' bičen' bene' lo ciudan' chososya'adie' che'.

²⁵ Na' ba zjancheje' Pablon' cont yeseyine' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de lsens chinle neda' sin cbi nezele še bin' nona', le neda' naca' bene' nación Roma.

²⁶ Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdołan', le naque' bene' nación Roma.

²⁷ Nach ben' yo'o lo ne'e soldadw ca' gwyeje' lao Pablon' gože'ne':

—Gwna neda' ¿le bene' nación Roma le'?

Nach Pablon' gože'ne':

—Bene' nación Roma neda'.

²⁸ Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

²⁹ Nach bene' ca' ba nita' cont yeseyine' Pablon' la' besyecuaste' cuiten', na' ben' yo'o lo ne'e yogo' soldadw ca' lecze bžebe' dan' ba bcheje' Pablon' cont yeseyine'ne'.

*Gosesele' Pablon' gan' chosoxi'a bene' ca' chesen-
abia' Israelen'*

³⁰ Nach beteyo ben' yo'o lo ne'e soldadw ca' gwseže' gdenṇa' nchej Pablon'. Na' bene' mandadw besedobe bχoz gwnabia' ca' len yogo' bene' gole blao ca' chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

23

¹ Nach Pablon' gwne'e bene' gole blao ca' chesen-
abia' nación Israelen' na' gože' legaque':

—Bene' migw, ža ṇa'aža nezda' lo' lažda'ogua' ba bena' can' chazlaže' Diosen'.

² Nach Ananías ben' nacch bχoz blao bene' mandadw len bene' ca' zjaze cuit Pablon' yesebaže' cho'ena'.

³ Na' Pablon' gože'ne':

—jDiosen' gone' le' castigw, bene' güəoayag! Chi'o nga cont gono' yela' justis chia' can' ža ley chechon' na' chono' contr ley beno' mandadw yesebaže' choa'.

⁴ Bene' ca' že' gala'ze gose'e Pablon':

—Bi cheyała' yoži'o xtižen' ca', le naque' bχoz blao che Dios.

⁵ Nach Pablon' boži'en gwne':

—Bene' migw, bi gwneзда' še benga b̄xoz blaon'. Neзда' Xtiža' Diosen' dan' nyojen žan: “Bi yoži'ile diža' zi' len bene' gwnabia' chelen'.”

⁶ Pablon' gočbe'ede' bene' ca' chesenabia' nación Israelen' zjanaque' čople. Bale' chesejle'e can' chsed chlo'e bene' ca' zjansi'e saduceo na' yebale' can' chsed chlo'e bene' ca' zjansi'e fariseo. Nach Pablon' gože' bene' ca' že'na':

—Bene' migw, naca' bene' fariseo, na' naca' xi'in bene' fariseo. Na' zoa' nga chonle yela' justis chia' neče chejli'a yesyeban bene' guat ca'.

⁷ Beyož gwne' ca' bene' fariseo ca' len bene' saduceo ca' ben' zjandop zjanžag na' gosezolagüe' chosošaše', na' besechoje' čople.

⁸ Le bene' saduceo ca' chesene' bi yesyeban bene' guat ca' na' bi chesejle'e nita' angl o nochle spiritw yoble. Na' bene' fariseo ca' chesejle'e yesyeban bene' guat ca' na' chesejle'e nita' angl na' nita' nochle spiritw.

⁹ Yogo' ben' že'na' chesosye'e chosošaše'. Nach to čope bene' zjansed ley dan' bzoj Moisésen', ben' zjanac bene' fariseo, gosezože'e gosone' Pablon' txen, gosene':

—Bibi da' mal non benga. Še no spiritw o no angl ba gw̄nelen le', bi cheyala' goncho contr le', le' contr Diosen' goncho še ca'.

¹⁰ Leca gwche' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw če' ca' cont jasyeleje' Pablon' ladjo bene' ca' na' besyeče'ene' cuartelen' da' yoble.

¹¹ Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lecz ca' cheyała' go'o xtižan' ciuda Roma.

Bosoxi'e yesote' Pablon'

¹² Na' beteyo bał beņe' Israel besedobe' na' bosoxi'e yesote' Pablon'. Na' gosečhogbi'en, gosene':

—Diosen' goņe' chio' castigw še ye'ej gagwcho sin cbiņa' gotcho Pablon'.

¹³ Nde čhoa beņe' bosoxi'e yesote' Pablon'.

¹⁴ Nach ja'aque' gan' že' bχoz gwnabia' ca' len beņe' gole beņe' blao ca' chesenabia' nación Israelen' na' gose'e legaque':

—Bač gwčhogbia'to' goņ Diosen' neto' castigw še ye'ej gagwto' sin cbiņa' gotto' Pablon'.

¹⁵ Na' le yotobe lježle le gon yela' güexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwyožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa to bi' byo bi' nac xi'in beņe' zan Pablon' na' lebe' benebe' da'na' chesacde' yesonde' le'. Na' gwyejbe' cuartelen' jazenebe' Pablon'.

¹⁷ Nach Pablon' goxe' to beņe' chnabi'e to gayoa soldadw na' gože'ne':

—Ben goclen gwče' bi' nga lao beņe' gwnabia' čhelen'. De to da' ye'be' le'.

¹⁸ Beņe' gwnabia' che soldadon' gwče'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwnabe' goclen lagua' cont zedesana' bi' nga laguon', že' de to da' ye'be' le'.

19 Nach ben' yo'o lo ne'e yogo' soldadw ca' be_xue' na'be' gw_che'ebe' to šla'ale gw_nabde'be':

—¿Bi che'ndo' nao' neda'?

20 Nach bi'na' gožbe' le':

—Be_ne' blao che be_ne' Israel gualaž cheto' ca' ba bosoxi'e yese_nabe' cuejo' Pablon' gw_xe na' yosode'ede' selo'ne' gana' chesežag be_ne' gwnabia' chegaquen' cont yese_yiljwyože' bi da' xinj non Pablon'.

21 Perw bi šejli'o chegaque'. Nde choa be_ne' ca' yesebe'na'ogüe' Pablon' tnez cont yesote' le' na' ba gose_chogbi'en bibi yese'ej yesagüe' šlac bi_na' yesote'ne'. Na' ba chesebeze' gwzenago' chegaque' cont cuejo' Pablon'.

22 Nach ben' yo'o lo ne'e soldadon' bose'e bi'na' na' gože'be':

—Gwsaco' bi go'o diža' che rson_na' ba bedesano' lagua' nga.

Gosese_le' Pablon' lao gobernador ben' le Félix

23 Nach ben' yo'o lo ne'e yogo' soldadw ca' goxe' chope be_ne' gwnabia' ben' chesenabia' to gayoa güeje soldadw na' bene' mandadw yososi_ni'a chegaque' cont šja'aque' ciuda Cesarea do cheda ga šeže'le na' yese_che'e chop gayoa soldadw be_ne' yesa'ac ni'aze na' gayonši be_ne' yesebia cabayw na' ye_chop gayoa soldadw be_ne' yeso_xe' lanza.

24 Lecze gože' legaque' chyažje cabayw be cuia Pablon', le le'na' yese_che'e gana' zoa gobernadoren' ben' le Félix, na' yesape' Pablon' cont bibi gac che' tnez.

25 Nach bzoje' to cart che gobernadoren' da' bgo_xe' legaque', žan:

26 “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox.

27 Bene' Israel ca' ba gosezene' benga na' ba bosoxi'e yesote'ne', perw cate' gwnezda' naque' bene' nación Roma, gwya'a len soldadw chia' ca' jasla'ne' lo na'gaquen'.

28 Na' cont nezda' bichen' chosocuiše' le', gwchi'ane' gan' chosoxi'a bene' gwnabia' che nación Israelen'.

29 Nach gwnezda' chosocuiše' le' che bize da' chesac che' len ley chegaque'na', na' bi nacho bi da' mal ba none' cont yesote' le' o cont gate' ližya.

30 Perw na' ba gwnezda' ba bosoxi'a bene' Israel ca' yesote' le', da'nan' la' chsela'tia'ne' laguo' le' na' lecze bena' mandadw len bene' ca' chosocuiš le' šja'aque' laguo' na' yesene' bin' chesac chegaque' len le'. Si'xenšco' yogo' da' quinga chneyoeda' le'. Claudio Lisias.”

31 Nach soldadw ca' gosone' can' ben bene' gwnabia' chegaquen' mandadw, besyebeje' Pablon' na' šeže'le gosegüe'e nez len le' besežine' yež da' nzi Antípatris.

32 Na' cate' gwyeni' besyebi'i soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'.

33 Na' cate' besežine' ciuda Cesarean' bosonežjue' gobernadoren' carten' zjanoxe'na' na' lecze gosone' Pablon' lo ne'e.

34 Na' gobernadoren' cate' beyož blabe' carten' gwñabde' Pablon' ga bene' naque'. Na' cate' gwnezde' naque' bene' distritw Cilicia,

35 nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

24

Pablon' be'e diža' lao gobernador Félix

¹ Cate' bačh goc gayo' ža zoa Pablon' ciuda Cesarean', nach bžin Ananías ben' nac bꝛoz blaoch che bene' Israelen' na' nche'e to chope bene' gole blao chegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore' gosagüe' xya che Pablon'.

² Na' cate' jasexi'e Pablon', Tértulon' gwdagüe' xya che', gože' gobernador Félixen':

—Si'xeno', señor gobernador, za'to' laguo' nga. Binlo juisyw zoa nación chechon' na' da' zan da' šagüe' ba chac da' chnabi'o neto'.

³ Gate'tez zoato' žato' choꝛcleno' can' chono'na', señor gobernador, catec chbeto' can' chnabi'ona'.

⁴ Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a.

⁵ Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' chople. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež Nazaret.

⁶ Na' goclaže' gone' da' mal juisyw lo' yodao' cheton' na' da'n'an' gwzento'ne' cont chogbia'to' che' con can' ža ley cheton'.

⁷ Perw na' gwyaz Lisiasen' ben' nac bene' gwn-
 abia' che soldadw ca' na' beque'ene' lo na'ton'.

⁸ Na' gože' neto' cheyała' yidto' laguo' nga cont
 gwcuišto'ne'. Guac nabdo' Pablon' cuino' cont
 nezdo' nac da' li can' chcuišto'ne' nga.

⁹ Nach bene' Israel ca' za'aclene' Tértulon'
 gosaque' toze len le' gosene' le can' naquen.

¹⁰ Nach gobernadores' bene' señw len Pablon'
 cont ne', na' Pablon' gwzologüe' gwne':

—Nezda' ba goc zan iz chono' yela' justis che
 nación ni, na' da'nán' chbeda' gwzoa' rson chian'
 laguon'.

¹¹ Na'a chac šižiñw ža gwya'a Jerusalénna' jenx-
 ena' Diosen'. Na' guac nabdo' bene' ca' besele'e
 neda' še leca' naquen.

¹² Bi nacho besele'ede' chacyoža' len no bene'
 lo' yodao' blaon' ne lo' yodao' yoble o gate'teze lo
 ciudadan'.

¹³ Na' bibi gac yeson bene' quinga cont yosolo'e
 napa' dola' ca dan' chosocuiše' neda'.

¹⁴ Bi gwcuasha' diža', da' li chonxena' Diosen' ben'
 gosonxen da' xozxta'oto' ca', la'czła' chonxena'ne'
 can' cheson bene' ca' zjanao' da' cobe dan' bi
 chesazlaže' bene' quinga, na' chejli'a che yogo'lol
 Xtiža' Diosen' dan' nyoj le'e ley cheton' na' da' ca'
 bosozoj bene' ca' goso'e xtiža' Diosen' cani'.

¹⁵ Na' zoa' lez yosban Diosen' bene' ca' ba gosat,
 bene' güen lente bene' mal. Lencze bene' gualaž
 chia' can' nite' lez gon Diosen' ca'.

¹⁶ Da'nán' zoa' chi' yichja' chona' can' chaclaže'
 Diosen' neche nezda' lo' yichjlažda'ogua' bibi dola'
 napa' lao Diosen' ne lao benachen'.

17 'Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'.

18 Ca' goquen' zoa' lo' yodao' blaon' ba bexi beyacha' can' cheyala' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, neca ndop nžaga' bene' zan.

19 Na' bene' ca' za'ac distritw Asian' cheyala' yesid cuine' yosocuiše' neda' laguo' nga še bi da' mal chesacde' chona'.

20 Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'.

21 Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': "Ca nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat."

22 Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

23 Nach bene' mandadw beče' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

24 Nach beza' gobernador Félixen' ciuda Cesarean', perw cate' gwde to chope ža bežine' da'

yoble nche'e no'ol che' ben' le Drusila. Na' Drusilan' naque' no'ole Israel. Nach gobernadoren' bene' mandadw gosaxe' Pablon' da' yoble na' bzenague' be' Pablon' diža' gwne' yogo'lol beņe' cheyała' yesejnilaže' Jesucriston'.

²⁵ Nach Pablon' be'lenche' le' diža' can' cheyała' gaccho beņe' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' beņach na' gwnežjue' castigw che yogo' beņe' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

²⁶ Gobernadoren' gocde' še gwnežjo Pablon' le' mechw cont yosane' le'. Da'nan' goxe' Pablon' güeltze be'lene' le' diža'.

²⁷ Ca' chac gwde chop iz nach yeto beņe' yoble beņe' le Porcio Festo gwdie' blane' xlatje'. Na' Félixen' goclaže' yega'ane' binlo len beņe' Israelen' cate' ba bechoje' gobernador, da'nan' bene' mandadw bega'an Pablon' ližyan'.

25

Pablon' bzoa rson che' lao gobernador Feston'

¹ Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeje' Jerusalénna'.

² Nach bχoz gwnabia' ca' len nochle beņe' blao che beņe' Israel ca' ja'aque' jasene'e le' cont bosocuiše' Pablon'.

³ Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le'

gone' ca' le gosaclačže' yesebe'na'ogüe' Pablon' cont yesote'ne' tnez.

⁴ Na' gobernador Feston' boži'e xtiža'gaque', gwne':

—Yega'anche' Cesarean' gan' die' ližyan' le neda' bich chžeda' ša'a na'.

⁵ Na' le cuej no bene' gwnabia' chele seła'le legaque' len neda' cont yosocuiše' le' lagua' gan' gona' yela' justis še bi da' xinj ba none'.

⁶ Nach gwzoa gobernadoren' len legaque' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwey Pablon' lagüen'.

⁷ Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosechjte' le' na' gosezologüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e.

⁸ Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blaō cheton' na' ne len rey César ben' chnabia' doxen nación Roman'.

⁹ Na' Feston' goclačže' yega'aņe' binlo len bene' Israel ca', da'nana' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

¹⁰ Nach Pablon' gwne':

—Rey Césarēn' ba nzoe' le' cont gono' yela' justis, na' cheyala' gac yela' justis chia' laguo' nga. Ca nac bene' Israel quinga, le' nezczedo' bibi da' xinj na' gona' len legaque'.

11 Šaca' ba gwdapa' do_la' o bichle da' ba bena' da' cheya_la' gata', bi žia' bi gata'. Perw bibi nona' ca nac dan' chosocuiše' neda' nga, na' nono zaca' gwde neda' laogaque'na'. Da'nan' ch_haba' tia' lao rey Césaren' cont gone' yel_a' justis chian'.

12 Nach Feston' bene' yel_a' güexi'a len be_ñe' gwnabia' che' ca' bi yesone' len Pablon' nach gože'ne':

—Ba gw_habo' tio' lao rey César na' lagüe' nan' šejo'.

Gobernador Feston' bdie' Pablon' lao rey Agripan'

13 Na' cate' ba gwde yeto chope ža, rey Agripa len no'ol che' ben' le Berenice besežine' Cesarean' bedeseague' Feston' tiox.

14 Na' cate' gw_ñeze gobernador Feston' ñite' yezan ža, nach be'lene' rey Agripan' diža' che' Pablon', gože'ne':

—Zoa to be_ñe' nyixjw Félixen' ližya nga cate' bechoje'.

15 Na' cate' gwya'a Jerusalén_na' b_xoz gwnabia' ca' na' nochle be_ñe' blao che' be_ñe' Israel ca' gosenabe' choglaguan' cont gaque' castigw.

16 Perw na' goše'gaca'ne' bi de costumbr che' chio' be_ñe' nación Roma gwdecho be_ñe' yesaque' castigw še' bi yesyedillagüen' len be_ñe' ca' chosocuiš le' cont yosozoa rson chegaque'.

17 Nach cate' besela'aque' nga beteyo la' gwche'tia' gan' chona' yel_a' justis na' bena' mandadw gosebeje' Pablon'.

18 Na' cate' bosocuiš bene' ca' le', ñe toz da' mal dan' chacda' yososbague'de' le' bibi gosene'.

19 Dan' chac chegaque', bi chejnilaže' Pablon' can' chesejnilaže' legaque', na' cheso'e diža' che to be_{ne}' ba got, be_{ne}' le Jesús, na' Pablon' že' mbancze'.

20 Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chosobague'de' le'.

21 Nach Pablon' gw_nabe' šeje' gone' yela' justis che' lao rey César Augusto, na' bena' mandadw beyeyjue' šlac gac gw_dia'ne' lao rey Césaren'.

22 Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gw_xe gwzenago' che' šeca'.

23 Nach beteyo gosacxenchgua rey Agripan' len Berenice cate' goso'e gana' chi' gobernadoren', na' lecz zjachi' be_{ne}' ca' chesenabia' soldadw ca' na' yogo' no be_{ne}' blao che ciudan'. Na' gwdena' Feston' bene' mandadw jasexi'e Pablon'.

24 Na' Feston' gwne':

—Rey Agripa, na' len yogo' le'e že'le nga len neto', ca nac benga ze laole nga, yogo' be_{ne}' Israel be_{ne}' že' Jerusalén len be_{ne}' že' Cesarea nga ba gose'e neda' benga naque' be_{ne}' mal na' yogo'cze' chesene' bi cheya_la' bane'.

25 Na' ba gw_nabyoža' na' gota'bia' bibi none' da' zaca' choglaguan' che' gate'. Na' ba gw_nabe' tie' lao rey César gone' yela' justis che', na' ba gw_{ch}eba' gw_dia'ne' ciuda Roma na'ale gan' zoa rey Césaren'.

26 Na' chacžejlaža', le bibi chežellaža' gwzoja' reyen' yapa'ne' bin' none'. Da'nan' ba_{ch} gwleja'ne' laole nga, na' chbechgüeda' chbeja'ne' laguo' le'

rey Agripa, cont yeyož gwzenagcho che' na' gata' bi da' gwzoja'.

²⁷ Chacda' bi naquen to liča seļa'ne' Roman' sin cbi gwzoja' še bin' none'.

26

Pablon' bzo'e' rson che' lao rey Agripan'

¹ Nach rey Agripan' gože' Pablon': —Guac ṇao' bi da' gaclenen le'.

Nach Pablon' gw^lis ne'en lao bene' ca' gwzo-lagüe' bzoa rson chen', gwne':

² —Chbechgüeda' rey Agripa, ba gosone' latje gua' diža' laguo' nga ṇa'a ca' nac dan' chosocuiš bene' Israel gualaž checho ca' neda'.

³ Le' nombi'o costumbr che chio' bene' Israel na' nezdo' can' chesacyož bene' gualaž checho ca' legacze'. Da'nan' chata'yoeda' le' gapšco' yela' chx-enlaže' gwzenago' chia' nga.

Quinga ben Pablon' cate' biṇa' šejnilaže' Criston'

⁴ 'Yogo' bene' Israel gualaž chechon' zjaṇezde' can' ba gwzoa' chonxena' Diosen' cate' ṇe' nactia' bidao', caten' gwzoa' laža' lente caten' gwzoa' ciuda Jerusalén.

⁵ Na' še chese'nde' yeso'e diža', lecze zjaṇezde' goca' txen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogolol costumbr gole can' nyoj ley chechon' clal can' cheson yezica'ch bene' Israel gualaž checho ca'.

⁶ Na' legaque' chesagüe' xya chia' neche chejli'a gwžin ža cate' Diosen' yosbane' bene' guat ca' can' gože' da' xozxta'ocho ca'. Neche da'nan' zoa' nga ṇa'aža cont gac yela' justis chian'.

⁷ Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nan' chesonxene' le' do ža do yel. Lecz neda' zoa' lez gac ca', na' da'nan' bal bene' Israel gualaž chechon' chosocuiše' neda' nga rey Agripa.

⁸ Na' le'e chi'le chzenagle chia', ¿bixchen' chaquele nono šejle' dan' yosban Diosen' bene' ca' ba gosat?

Cana' Pablon' bgue'ede' bene' chesejnilaže' Criston'

⁹ 'Cana' neda' gocda' cheyała' gue'eda' bene' ca' chesonxen Jesús ben' nac bene' Nazaret, na' da' zan benchgua' contr legaque'.

¹⁰ Bene' zan bene' chesejle' che Jesúsen' Jerusalénna' gwđixjua' ližya, gwđapa' yiš dan' bosozoj bxož gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'.

¹¹ Na' zan las gwy'a'a to to yodao' jasaca' legaque' cont yesebejyichje' bich yesonxene' Jesúsen'. Na' catec bgue'eda' legaque' gwy'a'a yež zito' jalagšiba' legaque'.

Da' yoble Pablon' cho'e diža' can' goc che' cate' Diosen' bocobe' yichjlažda'ogüe'

(Hch. 9:1-19; 22:6-16)

¹² 'Can' goc to ža cate' zya'a ciuda Damascon', noxa' yiš che bxož gwnabia' ca' dan' žan gwchi gwsaca' bene' ca' chesonxene' Jesúsen'.

¹³ Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba,

chseni'chen ca gwbižen', na' gwyečhjen neda' len beņe' ca' zya'alena' txen.

14 Na' yogo'to' gwbiḡto' lo yon', na' neda' benda' to beņe' chņe' diža' hebreo gwne': "Saulo, Saulo ḡbixchen' chčhi chsaco' neda'? Dan' chondo' neda', chone zi' cuino' ca chon to go'n be chlibe lo ya dan' zoa lao carroš cheban'."

15 Nach bol güiža'ne', goža'ne': "¿No le' beņe'?" Nach Xana' Jesúsen' boži'en, gwne': "Neda' Jesús na' neda' chčhi chsaco'."

16 Beyas, le bačh blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'.

17 Na' na'a seļa' le' gan' že' beņe' ca' bi zjanac beņe' Israel. Na' bi goņa' latje no got le', ne beņe' Israel gualaž chio' ca' na' ne beņe' bi zjanac beņe' Israel.

18 Chseļa' le' gan' že' beņe' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtola'gaque', na' lecze chaclaža' yesaque' txen len nochle beņe' chesejnilaže' neda' beņe' ba zjanac lo na' Diosen'."

Pablon' bsed blo'ede' beņe' xtiža' Criston'

19 'Ca' goc chia' rey Agripa, bzenaga' ca dan' gož Jesúsen' neda' zoe' yaban' caten' ble'edagüeda'ne' tnez.

20 Zgua'tec jazejni'ida' beņe' ca' že' ciuda Damasco xtiže'na' na' gwdechle jazejni'ida' beņe' ca' že' Jerusalénna' len beņe' že' doxen distritw Judean', goše'gaca'ne' cheyaļa' yesebejyichje' xtola'gaque' na' yosozenague' che Diosen' na' yesone' da' güen

cont gacia' ba gosebejyichje' da' malen'. Can' bzejni'ida' be_{ne}' Israel gualaž checho ca' lente be_{ne}' ca' bi zjanac be_{ne}' Israel.

²¹ Na' ne_{che} dan' chona' ca', be_{ne}' gualaž checho be_{ne}' chesegue'ede' neda' gosezene' neda' yodao' blaon' na' gosaclaže' yesote' neda'.

²² Perw na' Diosen' zoe' chaclene' neda', na' da'nan' zoacza' cho'a xtižen' ža na'aža len yogo'lolle že'le nga, le'e nacle be_{ne}' blao lente le'e bi nacle be_{ne}' blao. Bi nacho bichle chzejni'ida' be_{ne}' da' bi bzoj da' Moisésen' len yezica'chle ben' goso'e xtiža' Diosen' cani'.

²³ Gosene' Criston' ben' za' sela' Diosen' saca'zi'e na' gate' na' gaque' be_{ne}' nechw yebane' ladjo be_{ne}' guat ca'. Na' lecz gosene' le'na' gwzende' be_{ne}' Israel len be_{ne}' bi zjanac be_{ne}' Israel can' cheyala' yesone' cont šo' be'ni' che' lo' yichjlažda'ogaque'.

Pablon' goclaze' šejnilaže' rey Agripan' Jesucriston'

²⁴ Ca' cho'e dižan' cate'cze gobernador Feston' gwne' zižje gože'ne':

—jChactonton' Pablo! Dan' ba bsedteco' nan' bač chactonto'.

²⁵ Nach Pablon' gože' gobernadore'n':

—Bi chactonta' señor gobernador, san diža' lin' cho'a, diža' da' zaca' gwzenago'.

²⁶ Na' rey Agripa nga nombi'e da' quinga choa' diža' čhen, da'nan' bi chžeba' choa' diža' lagüe' nga. Nežda' chacbe'ede' choa' diža' li, le dan' goc čhe Jesús'en' bi nacho goquen bagaše'ze.

²⁷ Le' rey Agripa, čchejli'o da' ca' bosozoj be_{ne}' ca' goso'e xtiža' Diosen' cani'? Nežda' chejli'on.

28 Nach rey Agripan' gože' Pablon':

—¿Chacdo' bedao' co'oyelo' neda' cont šejnilaža' Jesucriston'?

29 Nach Pablon' gože'ne':

—Chṇaba' lao Diosen' žin ža cate' le' len yezica'chle beṇe' že' nga šejnilaže'le Jesucriston' can' chejnilaža'ne', še yob o še ṇe' chžach, perw cbi gata'le ližya can' dia' neda'.

30 Beyož gwna Pablon' ca' bežoža' rey Agripan' len no'ol čhen' Berenice, na' len gobernador Feston' na' len beṇe' ca' gosebe' len legaque'.

31 Nach cate' ba besyeyo'e ga yoble, rey Agripan' na' gobernador Feston' gose' lježe':

—Bi ṇacho ba non benga da' zaca' gate' o da' zaca' čhixjwchone' ližya.

32 Nach rey Agripan' gože' Feston':

—Šaca' bi gwṇabe' tie' lao rey Césaren' cont gac yela' justis che'na' guac yosančhone'.

27

Gosesele' Pablon' ciuda Roman'

1 Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo na' to xan soldadw beṇe' le Julio. Na' Julion' naque' txen len soldadw ca' ben' zjansi'e Batallón čhe Augusto. Na' neda' Lucas gwzoa' len Pablon'.

2 Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' beṇe' ciuda Tesalónica dan' chi' distritw Macedonia.

³ Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeje' gan' že' bene' migw che' ca' cont bosonežjue' le' bi dan' byažjde'.

⁴ Na' cate' bechojto' ciuda Sidónna' beza'to' bedeto' gała'ze gan' nla' yežlio dan' chi' lo' nisdao' dan' nzi' Chipre. Chečhjchgua be' clele ca horen', na' yežlionna' bcue'ejen neto' len be'na'.

⁵ Na' beyož gwdeto' lo' nisdao' dan' de gała'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶ Na' ciuda Miran xan soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'.

⁷ Nach gwza'to' zejto' lo' nisen' da' yoble. Zan ža zejto' šolaže', cañe bžinto' gwdeto' ciuda gan' nzi' Gnido. Na' dan' ne' chečhj ben' clele gan' zejton', da'nana' bi goc šejto' licha, nach gwca'ato' zejto' chcue'ej cuinto' len yelate' yežlio dan' nga'an lo' nisdan' dan' nzi' Creta, gan' bitec gwyečhj be', na' gwdeto' gała'ze gan' zoa to ya'a da' nzi' Salmón.

⁸ Na' zejto' gała'ze ga zoa yo biž chcue'ej cuinto', cañe bžinto' gan' nzi' Buenos Puertos gała'ze yež dan' nzi' Lasea.

⁹ Goc zan ža zejto' ca' na' bačh chžebto' šjažiyi' cuinto' lo' nisdan', le ba bžin tiemp zag cate' chečhjchgua be'. Nach Pablon' gwneyoede' bene' ca' yesebeze' na'ze.

¹⁰ Gože' legaue':

—Le'e bene' le'e chsa'le barcon', ba chacbe'eda' can' zejcho nga cañe chac chzan', xož cuiayi' bar-

con' len yoa' chelen', na' lente chio' yo'ocho lo' barcon' xož cuiayi'cho.

¹¹ Nach xan soldadw ca' bzenagche' che xan barcon' na' che ben' chsa' len clel ca che Pablon'.

¹² Le bi nac latje güen cho'a nisdao' gan' zoaton' ga'anto' tiemp zaguen', na' gwyan bene' ca' gosacde' cheyala' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxoa gwbiž.

To be' gual gwyechjen lo nisdan'

¹³ Cate' gwzolao chechj to be' goł dan' za' che'elje na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo nisen' da' yoble to lcue'ej che Cretan'.

¹⁴ Gague goc sša cate' ba chac to be' gual da' nzi' Noreste chechjchguan clele gan' zej barcon'.

¹⁵ Na' chžiga'chguan barcon'. Bibi goc yesone' cont šejcto'. Na' btoblaže'to' gwžiga' ben' barcon' len neto' con can' chechjenna'.

¹⁶ Nach bžinto' to lcue'ej yežlio da' nga'an lo' nisen' dan' nzi' Clauda, gan' bitec chechj be'. Na' barcw cha'o gan' yo'oton'nxoben to barcw dao' da' chon žin choslan bene' cate' chac bi da' chac che barcw xenna'. Na' cane goc bocueto' barcw daon' lo' da' cha'ona'.

¹⁷ Beyoža' bchejto' barcw cha'ona' do gual cont gwlo'oto' fuers chen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo nisen' con gan' gwyej barcon'.

18 Beteyo ba chož nisen' lo' barcon' da' chechjchgua ben', nach gosešaše' yoa' dan' nsa' barcon' gwzolao bosozala'sazen' lo' nisen'.

19 Na' ža gwyone goclento' legaque' bzala'to' xšinlaz barcon' lo' nisen'.

20 Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

21 Bačh goc sša bi chagwto', nach Pablon' gože' bene' ca':

—Le'e bene', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwžiai' yoa' che barcon' len xšinlazen.

22 Perw na'a bi soayaše'le, ne tole cbi cuiayi' yela' mban chele, san barcw ngazen' cuiayi'.

23 Neda' chonxena' Diosen' na' ba ben cuina' lo ne'e, na' le' ba gwsele' to angl bene' blo'elagüe' neda' nže'e.

24 Nach angla' gože' neda' diža' nga: “Bi žebo' Pablo. Cheyala' žino' lao rey César ben' chi' ciuda Roma, na' da'nan' yelao', bibi gac chio', na' lez yosla Diosen' yogo' bene' ca' že' lo' barcon'.”

25 Na' dan' gwna anglen' ca', bene', le yebe. Nezda' Diosen' gone' gac dolol can' gož anglen' neda'.

26 Da' gac checho yecho'onen chio' yo biž da' nga'an late' lo' nisen'.

27 Na' cate' ba goc žta'gwbiž zejto' lo nisen' nžiga' ben' neto' nile nale lo nisdan' dan' nzi' Adria, nach ca do chel bene' ca' zjansa' barcon' gosache'ede' ba zejto' gala'ze yo biž.

28 Nach beseletje' to plom lo' nisen' cont boso'ochixe' ca do gaca'te' sitjw nac nisen'. Beyož

bosochixen'na' gosenezde' goquen šino'tochoa metr. Nach gosezdie' yelate' na' bosozchixen' da' yoble na' ca horen' goquen gažechoa metr.

²⁹ Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochijen' xan barcon' cont gosoxen' len, na' do chesežebze' chesebeze' batcan' šeni'.

³⁰ Nach beņe' ca' zjansa' barcon' gosaclaže' yosy-oxonje'. Besyeletje' barcw dao' dan' ncuā' xina' barcon', con bosode'ede' yeseletje' ancla ca' dan' ncuā' lagüen'.

³¹ Nach Pablon' bol güiže' xan soldadw ca', gože'ne':

—Še beņe' quinga bi yesyega'ane' lo' barcw nga, bi yelacho.

³² Nach soldadw ca' gosechogue' don' zjanca' barcw daon' bososanen' lo' nisa'.

³³ Do šbal Pablon' gwzolao gwņeyoede' yesagw beņe' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle.

³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' beḡue' to yetextil, be'e yela' choxclen che Diosen' lao yogo' neto' že'to' lo barcon' na' gwxi'e to pedasen' gwdagüen'.

³⁶ Nach yogo'to' bebeto' na' lecz gwzolaoto' gwdagwto'.

³⁷ Čhop gayoa gayonšino'to' nacto' že'to' lo' barcon'.

³⁸ Na' beyož gwdagwto' ca beljeto', nach trigon' da' ne' nga'anch lo' barcon', gosebejen' bosozalen' lo' nisdaon' cont barcon' bich goctequen zi'i.

Goxj barcon'

³⁹ Cate' gwyeni' bi zjanombi'e yežlion' gan' be-sežinen', perw besele'ede' de to latje ga žia nisen' šize na' cho'en_{na}' nac laše' lo yox. Nach gosaque' toze gosac_{laže}' yesone' cont žin barcon' šja_{chen}' laše' lo yoxen'.

⁴⁰ Na' gose_{chogue}' do che ancla ca', gosebe-jyichjen' lo' nisen'. Lecze goseseže' do dan' boso_{cheje}' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'.

⁴¹ Na' gosodie' ga chedi_l nesdaon' len yeto da' yoble, na' ja_{chaz} lagüe barcon' lo' yoxen', bich goc tan. Na' nisen' gwzolao bzo_{xjen} barcon' catec fuers nsan'.

⁴² Nach soldadw ca' gosac_{laže}' yesote' pres ca' cont bi yeseyel_e' nisen' na' yosyoxonje'.

⁴³ Perw xan soldadw ca' goc_{laže}' yosle' Pablon', da'nan' bžone' yeson soldadw ca' can' chesa_{claze}' yesonen'. Bene' mandadw len pres ca' še noe' chac chyela' nisen' zgua'tec lega_{que}' yesexite' lo nisen' cont yesyechoje' yo biž.

⁴⁴ Na' bene' mandadw bene' ca' bi chac yeseyela' nis yosochine' no yagla' o bichle xšin_{laz} barcon' cont yesyežine' lo yo. Na' can' gosone' na' yogüe' besyežine' lo yo bižen'.

28*Dan' goc che Pablon' šlac zoe' Malta*

¹ Cate' bechojto' lo' nesdaon' bžinto' yo bižen', bene' ca' že'na' gose'e neto' ba bžinto' gan' nzi'

Malta, naquen to yež dan' chi' to lo yežlio da' nga'anen lo' nisdaon'.

² Na' be_{ne}' ca' že'na' gosaque' be_{ne}' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag.

³ Nach Pablon' btobe' xonj xis bcue'en lo yin', cate' bchoj to bel be nac venen lo xis ca' gwdi'inba' ne'e go_{la}'ditban'.

⁴ Na' besele'e be_{ne}' Malta ca' na_{la}'dit belen' na' Pablon', na' gose' lježe':

—Benga nac_{lje}' be_{ne}' güet be_{ne}'. Da'n_{an}' la'cz_{la}' bele' lo' nisen', Diosen' bi güe'e latje banche'.

⁵ Nach Pablon' con gwžib ne'ena' lo yin' na' bexope belen', na' bibi gocde'.

⁶ Yogo' be_{ne}' ca' chesebeze' batcan' solao gata' ne'en yi o batca' gate'. Gosebeze' šša na' besele'ede' bibi gocde'. Nach gosone' xbab yoble, gosene' naque' to be_{ne}' šejnilaže'cho.

⁷ Na' be_{ne}' gwnabia' che doxen Malta le' Publio na' yežlio che' zjaden ga_{la}'ze latje gan' bžinton', na' blebe' neto', gwzoato' ližen' šone ža.

⁸ Na' xa Publion' chacšenchgüede' yo'e da' la na' che'ede' yiž chen. Nach Pablon' gwyo'e gan' de'na' bol güiže' Diosen', nach gw_xoa ne'en yičj be_{ne}' güen' na' beyaque'.

⁹ Beyožen' jasexi'e yezica'chle be_{ne}' lagüe yeža' be_{ne}' chese'ede' yižgüe' na' gwnabde' Diosen' yeyone' legaque', na' lecze besyeyaque'.

¹⁰ Na' da' zan da' güen goson be_{ne}' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

11 Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandría da' gwlezen latjen' šlac gwde da' zaguen'. Na' mben le'e barcon' l gua'a lsaca' che bene' ca' le' Cástor na' Pólux.

12 Na' bžinto' ciuda dan' nzi' Siracusa gan' bega'anto' šone ža.

13 Nga gozza'to' cont bžinto' yež da' nzi' Regio. Na' bega'anto' tža. Nach gwzolao chechj be' dan' za' che'elje, na' beza'to' da' yoble beteyo bezžinto' ciuda da' nzi' Puteoli na' bechojto' lo' barcon'.

14 Nga bežagto' bene' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwdena' gwza' ni'ato' zejto' Roman'.

15 Na' cate' za' žinto' ciuda Roman' goseneze bene' lježto' že' Roman' ba zoa žinto', na' baļe' bedeseleze' neto' latje gan' nzi' Šone Tiend na' yebaļe' lagüe ya'a dan' nzi' Che Apio. Cate' ble'e Pablon' legaque' be'e yeļa' choxclen che Diosen' na' gwbede' lo' yichjlažda'ogüe'.

16 Na' cate' bžinto' Roman', xan soldadw ca' bene' yezica'chle pres ca' lo na' bene' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

Pablon' be'e xtiža' Jesucriston' Roman'

17 Beyon ža bžinto', Pablon' goxe' bene' blaoc che bene' Israel ca' že' ciuda Roman'. Na' cate' beyož besedobe'na' gože' legaque':

—Bene' migw, bene' gualaž checho ca' že' ciuda Jerusalén gosezene' neda' gosone' neda' lo na' bene' gwnabia' che nación Roman', la'czla' bibi

bená' contr beṇe' gualaž ca' na' ne contr costumbr
che da' xozxta'ochon'.

18 Nach beṇe' gwnabia' che nación Roman'
goseṇabyože' na' gosaclaže' yososane' neda' cate'
gosacbe'ede' bibi nona' da' zaca' yesote'nda'.

19 Nach beṇe' gualaž ca' že' Jerusalénna'
bosožoncze' yososane' neda'. Da'nán' gwnaba'
tia' lao rey Césaren' cont gac yela' justis chia'. Perw
bi nacho gagua' xya che beṇe' gualaž checho da'
gosonde' neda' ca'.

20 Da'nán' zoa' nga bač goxa' le'e cont le'eda' le'e
na' güe'lena' le'e diža'. Na' ncheja' gden ni neche
dan' zoa' lez yosban Diosen' beṇe' ca' ba gosat,
cacze zan chio' beṇe' Israel zoacho lez.

21 Nach beṇe' ca' gose'ene':

—Bibi cart na' la' laoto' nga dan' za' distritw
Judean' da' bosozoj beṇe' Jerusalén ca' güen' diža'
še bin' chac len le', na' nono beṇe' gualaž na' la'
beṇe' ne mal chio'.

22 Perw chaclaže'to' yeneto' go'o diža' che dan'
chejli'o che Jesúsén', le nezeto' doxen chesene' che
le'e chejle'le che'.

23 Na' bosožie' bia' to ža cont šjasene'e le' da'
yoble, na' cate' bžin žan' beṇe' zan ja'aque' gan'
zoen'. Nach Pablon' be'lene' legaque' diža' do
ža. Be'e diža' che dan' cheyala' gwzenagcho
che Diosen' ben' chnabia' doxen, na' bzejni'ide'
legaque' da' ca' zjanyoj le'e ley dan' bzoj Moisésén'
na' len dan' bosozoj yezica'chle beṇe' goso'e xtiža'
Diosen' cani' che Jesucriston', cont yesejle'e che'.

24 Na' bal beṇe' ca' gosejle'e xtižen' da' be'e na'
yebale' bi gosejle'en'.

25 Dan' bi gosone' toz ca yesone' xbab, gwzolaon besyeya'aque'. Nach Pablon' gože' legaque':

—Dan' gož Spiritw che Diosen' da' Isaíasen' dan' bzoje' che da' xozxta'ocho ca' naquen da' li, žan:

26 Gwyej gož beņe' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

27 Nacle beņe' güedenag na' bač natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle beņe' güedenag.

Šaca' bi nacle beņe' güedenag, šejni'ile bi zejen dan' chenele na' dan' chle'ele.

Nach yetinjele xtoła'le cont yeca'an na' yocoba' yichjlažda'olen'.

28 Che'nda' nezele ba gwzolaon na'a Diosen' chsele' beņe' cheseyixjue'ede' xtižen' len beņe' bi zjanac beņe' Israel cont yosozenague' che' na' gata' yela' mban čegaque' toli tocaņe.

29 Beyož gwna Pablon' ca', beņe' Israel ca' besyežaše' chesacyožchgüe' che dan' gwnen'.

30 Na' čop iz nya' gwzoa Pablon' ciuda Roman' to yo'o ga chyixjue', na' blebe' yogo'loł beņe' jaseņe'e le'.

31 Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' beņe', na' be'e xtiža' Diosen' con can' goclaze'.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
de7d40fb-3909-53d8-8bea-744cf1ce0e41